

CHINESE - JAPANESE LIBRARY
HARVARD - YENCHING INSTITUTE
AT HARVARD UNIVERSITY
YAMAMOTO
NOV 21 1958

T 5237.47/1332

9

唐詩類苑卷第三十四

明雲間張之象玄超甫纂輯

雲間徐光啓子先甫編次

雲間王徹叔朗甫補訂

梁谿曹仁孫伯安甫校正

水部

汾水

玄宗祭汾陰樂章十一首

開元十一年二月壬子上將幸晉陽宰相張說言
於上曰汾陰睢上有漢后土祠其禮久廢陛下宜

哈佛大學漢和
圖書館珍藏

因巡幸修之爲農祈穀上從之

大樂和暢殷薦明神一降通感八變必臻有求斯應
無德不親降靈醉止休徵萬人

韓思復

坤元載物陽樂發生播殖資始品彙咸亨列俎棊布
方壇砥平神歆禋祀后德惟明

盧從願

大君出震有事郊禋齋戒旣肅馨香畢陳樂和禮備
候暖風春恭惟降福實賴明神

劉 晃

於穆睿哲維清緝熙肅事昭配永言孝思滌濯靜嘉
馨香在茲神之聽之用受福釐

韓 休

於穆聖皇六葉重光太原刻頌后土疏場寶鼎呈符

歆雲孕祥禮樂備矣降福穰穰

王 駿

聿修嚴配展事禋宗祥符寶鼎禮備黃琮祀祠以信
明德惟聰介茲景福永永無窮

崔玄同

蠲我漸饕絜我膏薌有豆孔碩爲羞旣臧至誠無昧
精意惟芳神其醉止欣欣樂康

賈 曾

禮物斯具樂章乃陳誰其作主皇考聖真對越在天
聖明佐神宵然汾上厚澤如春

蘇 頌

樂奏雲闕禮章載虔禋宗於地昭假於天惟馨薦矣
旣醉歆焉神之降福永永萬年

何 鸞

維歲之吉維辰之良聖君紱冕肅事壇場大禮已備

大樂斯章神其醉止降福無疆

蔣挺

方丘既膳嘉饗載謐齊敬畢誠陶匏貴質秀畢豐薦

芬俎盈實未永福流其昇如日

源光裕

汾陰行

李嶠

天寶末明皇乘春登勤政樓命梨園弟子歌數闕
有唱李嶠詩者云山川滿目淚沾衣富貴榮華能
幾時不見祗今汾水上惟有年年秋鴈飛時上春
秋衰邁問是誰詩或對曰李嶠因凄然涕下遽起
曰嶠真才子也又明年幸蜀登白衛嶺覽眺良久
又歌是詞復言李嶠真才子不勝感嘆時高力士

在側亦揮涕久之

君不見昔日西京全盛時汾陰后土帝親祠齋宮宿
寢設厨供撞鐘鳴鼓樹羽旗漢家四葉才且雄賓延
萬靈服九戎柏梁賦詩高宴罷詔書法駕幸河東河
東太守親掃除奉迎至尊導鑾輿五營將校列容衛
三河縱觀空里間回旌駐蹕降靈場焚香奠醑邀百
祥金鼎發食正焜煌靈祗煒燁攄景光埋玉陳牲禮
神畢舉麾上馬乘輿出彼汾之曲嘉可游木蘭為檝
桂為舟棹歌微吟綵鷁浮簫鼓哀鳴白雲秋歡娛宴
洽賜羣后家家復除戶牛酒聲名動天樂無有千秋

萬歲南山壽自從天子向秦關玉輦金輿不復還珠
簾羽蓋長寂寞鼎湖龍髯安可攀千齡人事一朝空
四海為家此路窮雄豪意氣今何在壇場宮館盡蒿
蓬路逢故老長嘆息世事回還不可測昔時青樓對
歌舞今日黃埃聚荆棘山川滿目淚沾衣富貴榮華
能幾時不見祗今汾水上惟有年年秋鴈飛

汾陰后土祠作

李適

昔余讀舊史徧觀漢世君武皇實稽古建茲百代勲
號令垂懋典舊經備闕文南巡歷九疑舳艫被江濱
耀兵十八萬旌旗何紛紛竭來茂陵下英威不復聞

我行歲方晏望極山河分神光終冥漠鼎氣獨氛氲
攬涕陟睢水登高見河汾雄圖今安在飛飛有白雲

澹水

侍宴澹水賦得濃字

張說

關中八水有澹水出藍田谷合金谷水北至灞城
入灞出入上林苑

千行發御柳一葉下仙筇青浦宜游至朱城紫氣濃
雲霞交暮色草樹喜春容藹藹天旗轉清笳入九重

侍宴澹水賦得長字

宗楚客

御輦出明光乘流泛羽觴珠胎隨日減玉漏與年長

寒盡梅猶白風遲柳未黃日斜旌騎轉休氣轉林塘
安州道中經澹水有懷 劉長卿

征途逢澹水忽似到秦川借問朝天處猶看落日邊
映沙晴漾漾出澗夜濺濺欲寄西歸恨微波不可傳

龍泓水

宴龍泓

武三思

登臨開勝地眺矚盡良遊岳嶂紫紆上澄潭屈曲流
泛蘭清興洽折桂野文適別後相思處崎嶇碧澗幽

奉和梁王宴龍泓應教

宋之問

水府淪幽壑星輶下太微鳥驚司僕馭花落侍臣衣

芳樹搖春晚晴雲遶坐飛淮王正留客不醉莫言歸

伊水

晚渡伊水

韋述

悠悠涉伊水伊水清見石是時春尚深兩岸草如積
迢遞望洲嶼逶迤亘津陌新樹落疎紅遙原上新碧
回首瞻洛陽遠有常山隔烟霧猶辨家風塵已為客
登陟多異趣往來見行役雲起早已昏鳥飛日將夕
光陰逝不借超然慕疇昔遠遊亦何為歸來存竹帛

伊水門

樓穎

朝陟伊水門伊水入門流愜心乃成興澹然汎孤舟

唐言卷之三十四
五
霏微傍青靄容與隨白鷗竹陰交前浦柳花媚中洲
日落陰雲生彌覺茲路幽聊以恣所適此外知何求

隴頭水

隴頭水

楊師道

通典曰天水郡有大阪名曰隴坻亦曰隴山卽漢
隴關也三秦記曰其阪九回上者七日乃越上有
清水四注下所謂隴頭水也

隴頭秋月明隴水帶關城笳添離別曲風送斷腸聲
映雪峰猶暗乘冰馬屢驚霧中寒鴈至沙上轉蓬輕
天山傳羽檄漢地急徵兵陣開都護道劍聚伏波營

於茲覺無度方共濯胡纓

經隴頭分水

岑參

隴水何年有潺潺逼路傍東西流不歇曾斷幾人腸

隴頭水

盧照隣

隴坂高無極征人一望鄉關河別去水沙塞斷歸腸
馬繫千年樹旌懸九月霜從來共嗚咽皆是爲勤王

隴頭水

沈佺期

隴山飛落葉隴鴈度寒天愁見三秋水分爲兩地泉
西流入羗郡東下向秦川征客重回首肝腸空自憐

隴頭水送別

儲光羲

唐言類考 卷之二十四 九
相送隴山頭東西隴水流從來心膽盛今日爲君愁
暗雪迷征路寒雲隱戍樓唯餘旌旆影相逐去悠悠

隴頭水

羅隱

借問隴頭水年年恨何事全疑嗚咽聲中有征人淚
自古無長策况我非深智何計謝潺湲一宵空不寐

隴頭水

僧皎然

隴頭心欲絕隴水不堪聞碎影搖槍壘寒聲咽幔軍
素從鹽海積綠帶柳城分日落天邊望逶迤入塞雲

隴頭吟

于濬

行人何徬徨隴頭水嗚咽寒沙戰鬼愁白骨風霜切

薄日矇矓秋怨氣陰雲結殺成邊將名名著生靈滅

隴頭水

王建

隴水何年隴頭別不在山中亦嗚咽征人塞耳馬不
行未到隴頭聞水聲謂是西流入蒲海還聞北去繞
龍城隴東隴西多屈曲野麋飲水長簇簇胡兵夜回
水傍住憶著來時磨劍處向前無井復無泉放馬迴
看隴頭樹

湖水

太湖秋夕

王昌齡

水宿煙雨寒洞庭霜落微月明移舟去夜靜魂夢歸

唐言類考 卷之三十四
暗覺海風度蕭蕭聞鴈飛

泊震澤口

薛據

日落草木陰舟徒泊江汜蒼茫萬象開合杳聞風水
洄沿值漁翁噉嘯逢樵子雲開天宇靜月明照萬里
早鴈湖上飛晨鐘海邊起獨坐嘆遠遊登岸望孤舟
零落星欲盡腫隴氣漸收行藏空自秉智識仍未周
伍胥既伏劍范蠡亦乘流歌竟鼓楫去三江多客愁

太湖詩三首

并序

皮日休

余頃在江漢嘗耨鹿門戲澗胡然而未能放形者
抑志於道也爾後以文事造請於是南浮至二別

涉洞庭迴觀敷淺源登廬阜濟九江由天柱抵霍
岳又自箕穎轉樊鄧陟商顏入藍關凡自江漢至
於京師者十數堠繞者二萬里道之不行者有困
辱危殆志之可適者有山水遊玩則休戚不孤矣
咸通九年自京東遊復得宿太華樂荆山賞女几
度輾轅窮高高入京索浮汴渠至揚州又航天塹
從北固至姑蘇噫江山幽絕見貴於地誌者余之
所到不翅於半則煙霞魚鳥林壑雲月可爲屬厭
之具矣尚惝然於志者抑古聖人所謂獨行之性
乎逸民之流乎余真得而爲也既後聞震澤包山

其中有靈異學黃老徒樂之多不返益欲一觀豁
 平生之鬱鬱焉十一年大司諫清河公憂霖雨之
 為患乃擇日休將公命禱於震澤祀事既畢神應
 如響於是太湖之中所謂洞庭山者得以恣討凡
 所歷皆圖籍稱為靈異者遂為詩二十章以志其
 事兼寄天隨子

初入太湖從胥口入去
州五十里

聞有太湖名十年未曾識今朝得遊泛大笑稱平昔
 一舍行胥塘盡日到震澤三萬六千頃頃頃玻璃色
 連空淡無類照野平絕隙好放青翰舟堪弄白玉笛

疎岑七十二雙雙露矛戟悠然嘯傲去天上搃畫鷁
 西風乍獵獵驚波菴涵碧倏忽雷陣吼須臾玉崖折
 樹動為蜃尾山浮似鰲脊春落照射鴻溶清輝蕩拋攬
 雲輕似可染霞爛如堪摘漸暝無處泊挽帆從所適
 枕下聞澎汜肌上生瘳瘵討異足遭迴尋幽多阻隔
 願風與良便吹入神仙宅甘將一蘊書未事嵩山伯

曉次神景宮

夜半幽夢中扁舟似鳧躍曉來到何許俄倚包山脚
 三百六十丈攢空利如削遐瞻但徙倚欲上先矍鑠
 濃露濕莎裳淺泉漸音尖草屨行行未一里即境轉寂

唐言類考 卷之三十四 九
冥靜徑侵沈寥仙扉傍巖壑松聲正清絕海日方照
灼歛臨幽虛天萬想皆擺落壇靈有芝菌殿聖無鳥
雀瓊帟自迴旋錦旌空粲錯鼎氣爲龍虎香煙混丹
牖凝看出次雲默聽語時鶴綠書不可注雲笈應無
鑰晴來鳥思喜菴裏花光弱天籟如擊琴泉聲似撻
鐸清齋洞前院敢負玄科約空中悉羽章地上皆靈
藥金醴可酣暢玉豉堪咀嚼存心服燕胎叩齒讀龍
躋福地七十二茲焉堪未託在獸乏虎羆於蟲不毒
蠶嘗聞擇骨錄仙誌非可作綠腸旣朱髓青肝復紫
絡伊余乏此相天與形貌惡每嗟原憲瘡常苦齊侯

瘡終然合委頓剛亦慕寥廓三茅亦嘗住竟與珪組
薄欲問包山神來賒少巖壑

入林屋洞

齋心已三日筋骨如煙輕腰下佩金獸手中持火鈴
幽塘四百里中有日月精連亘三十六各各爲玉京
自非心至誠必被神物烹顧余慕大道不能惜微生
遂招放曠侶同作幽憂行其門纔函丈初若盤薄矧
洞氣黑眈眈苔髮紅鬢鬢試足值坎窞低頭避崢嶸
攀緣不知倦怪異焉敢驚匍匐一百步稍稍策可橫
忽然白蝙蝠來撲松炬明人語散瀕洞石響高玲玎

脚底龍蛇氣頭上波濤聲有時若服匿偏仄如見繡
俄爾造平澹豁然逢光晶金堂似鑄出玉座如磨成
前有方丈沼凝碧融人情雲漿湛不動琉璃涵而馨
瀨之恐減筭勺之必延齡愁為三官責不敢攜一甌
昔云夏后氏於此藏真經刻之以紫琳秘之以丹瓊
期之以萬祀守之以百靈焉得彼丈人竊之不加刑
石簣一以出左神俄不肩禹書既云得吳國由是傾
蘇縫纜半尺中有怪物腥欲去既嘍喑將迴又伶俜
却遵舊時道半日出杳冥履泥惹石髓衣濕沾雲英
玄籙乏仙骨青文無絳名雖然入陰宮不得朝上清

對彼神仙窟自厭濁俗形却憎造物者遣我騎文星
五湖詩 汪遵

已立平湖霸越功片帆高颺五湖風不知戰國縱橫
者誰似陶朱得始終

泛太湖書事寄微之 白居易

煙渚雲帆處處通飄然舟似入虛空玉杯淺酌迎初
匝金管徐吟曲未終黃夾纈林寒有葉碧琉璃水淨
無風避旗飛鷺翩翩白鷺鼓跳魚潑刺紅澗雪壓多
松偃蹇巖泉滴又石玲瓏書為故事留湖上吟作新
詩寄浙東軍府威容從道盛江山氣色定知同報君

唐詩類苑 卷之二十四
一事應君羨五宿澄波皓月中

洞庭湖

宋之問

地盡天水合朝及洞庭湖初日當中涌莫辨東西隅
晶耀日何在澄熒心欲無靈光宴海若游氣耿天吳
張樂軒皇至征苗夏禹徂楚臣悲落葉堯女泣蒼梧
野積九江潤山通五岳圖風恬魚自躍雲夕鴈相呼
獨此臨泛漾浩將人代殊未言洗氛濁卒歲爲清娛
要使功成退徒勞越大夫

夜泛洞庭湖尋裴侍御清酌

李白

日晚湘水綠孤舟無端倪明湖漲秋月獨泛巴陵西
偶憇裴逸人巖居陵丹梯抱琴出深竹爲我彈鷓鴣
曲盡酒亦傾北牕醉如泥人生且行樂何必組與珪
秋登巴陵望洞庭 李白

清晨登巴陵周覽無不極明湖映天光徹底見秋色
秋色何蒼然際海俱澄鮮山青滅遠樹水綠無寒煙
來帆出江中去鳥向日邊風清長沙浦霜空雲夢田
瞻光惜頽髮閱水悲徂年北渚旣蕩漾東流自潺湲
郢人唱白雪越女歌採蓮聽此更腸斷憑崖淚如泉
陪侍郎叔遊洞庭醉後三首

李白

今日竹林宴我家賢侍郎三杯容小阮醉後發清狂

二

船上齊橈樂湖心泛月歸白鷗閑不去爭拂酒筵飛

三

剗却君山好平鋪湘水流巴陵無限酒醉殺洞庭秋

臨洞庭

孟浩然

八月湖水平涵虛混太清氣蒸雲夢澤波撼岳陽城
欲濟無舟楫端居耻聖明坐觀垂釣者徒有羨魚情

過洞庭湖

杜甫

鮫室圍青草龍堆隱白沙護堤盤古木迎棹舞神鵝
破浪南風正回檣畏日斜湖光與天遠直欲犯仙槎

洞庭湖

元稹

人生除泛海便到洞庭波駕浪沈西日吞空接曙河
虞巡竟安在軒樂詎曾過惟有君山下狂風萬古多

過洞庭

朱慶餘

帆挂狂風起茫茫既往時波濤如未息舟楫亦堪疑
旅鴈捉孤島長天下四維前程有平處誰敢與心期

賦洞庭

僧可朋

周極八百里凝眸望則勞水涵天影濶山拔地形高

賈客停非久漁翁轉幾遭颯然風起處又是鼓波濤
泊洞庭 僧可朋

槐柳未知秋依依館驛頭客心俱念遠時雨自相留
浪沒貨漁市帆高賣酒樓夜來思展轉故里在南州

岳陽館中望洞庭湖

劉長卿

萬古巴丘戍平湖此望長問人何森森愁暮更蒼蒼
疊浪浮元氣中流沒太陽孤舟有歸客早晚達瀟湘

杪秋洞庭懷王道士

謝太虛

漂泊日復日洞庭人更秋青桃亦何意此夜催人愁
惆悵客中月徘徊江上樓心知楚天遠目送蒼波流

謝客久已滅微言無處求空餘白雲在客與隨孤舟
千里杳難盡一身常獨遊故園復何許江漢徒遲留

過洞庭

李嶼

浩渺注黃流千潭合萬湫半洪侵楚翼一汜屬吳頭
動軸當新霽漫空正仲秋勢翻荆口迳聲擁岳陽浮
遠脉滋衡岳微涼散橘州星辰連影動嵐翠逐隅收
漸落分行鴈旋添趁伴舟昇騰人莫測安穩路何憂
氣與塵中別言堪象外搜此身如粗了來把一竿休

送梁六歸洞庭山作

張說

巴陵一望洞庭秋日見孤峰水上浮聞道神仙不可

接心隨湖水共悠悠

至巴陵與李十二裴九同泛洞庭

賈至

江畔楓葉初帶霜渚邊菊花亦已黃輕舟落日興不盡三湘五湖意何長

初至巴陵與李十二白同泛洞庭湖二首

賈至

江上相逢皆舊遊湘山永望不堪愁明月秋風洞庭水孤鴻落葉一扁舟

楓岸紛紛落葉多洞庭秋水晚來波乘興輕舟無近

遠白雲明月弔湘娥

陪族叔刑部侍郎擘及中書賈舍人至遊洞

庭五首

李白

洞庭西望楚江分水盡南天不見雲日落長沙秋色遠不知何處弔湘君

南湖秋水夜無煙耐可乘流直上天且就洞庭賒月色將船買酒白雲邊

洛陽才子謫湘川元禮同舟月下仙記得長安還欲笑不知何處是西天

洞庭湖西秋月輝瀟湘江北早鴻飛醉客滿船歌白

亭不知霜露入秋衣
帝子瀟湘去不還空餘秋草洞庭間
淡掃明湖開玉鏡丹青畫出是君山

洞庭送李十二赴零陵 賈至

今日相逢落葉前洞庭秋水遠連天
共說京華舊遊處回看北斗欲潸然

洞庭 劉夢得

湘江秋月兩相和潭面無風鏡未磨
遙望洞庭山翠小白銀盤裏一青螺

洞庭 雍陶

煙波不動影沈沈碧色全無翠色深
疑是水仙梳洗處一螺青黛鏡中心

宿洞庭 鄭雲叟

月到君山酒半醒朗吟疑有水仙聽
無人識我真閑事贏得高秋看洞庭

過南岳入洞庭湖 杜甫

洪波忽爭道岸轉異江湖鄂渚分雲樹
衡山引舳艫翠芽穿裊蔣碧節吐寒蒲
病渴身何去春生力更無壤童犁雨雪
漁屋架泥塗歌側風帆滿微冥水驛孤
悠悠迴赤壁浩浩略蒼梧帝子留遺恨
曹公屈壯圖

聖朝光御極殘孽謂吐蕃也駐艱虞才淑隨廝養名賢隱
鍛鑪邵平元入漢張翰後歸吳莫怪啼痕數危檣逐
夜烏

宴小洞庭

蘇源明

天寶十二載源明守東平宴濮陽崔季重魯郡李
蘭濟南田琦濟陽李陵於回源亭為小洞庭五大
守燕集載其歌云

小洞庭兮寓方舟風嫋嫋兮離平流寓方舟兮小洞
庭雲微微兮連絕徑層瀾壯兮緬以沒重岳轉兮超
以忽馮夷逝兮護輕橈蛟龍行兮落增潮泊中潮兮

澹而閑並曲激兮悵而還適予手兮非予期將解袂
兮藜予回尚君子兮壽厥身承明主兮憂斯人

餞袁廣于小洞庭

蘇源明

源明時以國子司業召須尉袁廣餞于小洞庭復
歌云

浮漲湖兮莽條遙川后禮兮扈予橈橫增沃兮蓬仙
延川后福兮易予船目澄凝兮明空波星磊落兮耿
秋河夜既涼兮酒且多樂方作兮柰別何

洞庭言懷

李白

見人部述懷

宿青草湖

杜甫

青草湖與洞庭湖相連在岳州

洞庭猶在目青草續爲名宿槩依農事郵籤報水程
寒水爭倚薄雲月遞微明湖鴈雙雙起人來故北征

澧湖作

并序

趙冬曦

巴丘南澧湖者蓋沅湘澧汨之餘波焉茲水也淪
匯洞庭澹澹千里夏潦奔注則決爲此湖冬霜旣
零則涸爲平野按爾雅云水返入爲澧斯名之作
有由焉爾而此鄉炎暑子月草生彌望青青相與
遊藉豈盈虛之可嘆亦風景之多傷感物增懷因

書其事

三湖返入兩山間畜作澧湖灣復灣暑雨奔流潭正
滿微霜及潦水初還水還波捲溪潭涸綠草芊芊岸
嶄峿適來飛棹共洄旋已復揚鞭恣行樂道傍耆老
步躑躑楚言茲事不知年試就湖邊披草徑莫疑東
海變桑田君訝今時盡陵陸我看明歲更淪漣來今
自昔無終始人事廻環恒若懸應思闕下聲華日誰
謂江潭旅泊年初真正喜固賞然往蹇來譽宜可傳
盈虛用舍輪與旋勿學靈均遠問天

同趙侍御澧湖作

張說

雁南湖水嘯山川春江溢入共湖連氣色紛淪橫
海波濤鼓怒上漫天鱗宗殼族嬉爲府弋叟及師利
焉聚歆帆側施弄風口赴險臨深繞灣浦一灣一浦
悵邐迥千曲千澁况迷哉乍見靈妃含笑往復聞遊
女怨歌來暑來寒往運廻泐潭生水落移陵谷雲間
墜翻散泥沙波上浮查樓樹木昨暮飛霜下北津今
朝行鴈度南濱處處溝洿清源竭年年舊葦白頭新
天地盈虛尚難保人間倚伏何須道秋月晶晶泛澄
瀾冬景青青步織草念君宿昔觀物變安得踟蹰不
衰老

秋夜遊滄湖二首

并序

尹 忭

燕公以蓋

董一作

司馬初到趙侍御客焉聿理方舟

嬉遊滄壑覽山川之異採泉石之竒騁望崇朝留
樽待月一時之樂豈不盛與賦詩者列之於左

熊軾巴陵地鷁舟湘水潯江山與勢遠泉石自幽深
香藹入天壑冥茫見道心超然無俗事清宴有空林

二

江湖饒竒山嶺羅雲水間風秋樹色雜苔古色文斑
巴俗將千港滄湖凡幾灣嬉遊竟不盡乘月泛舟還

秋夜遊滄湖二首

張 說

唐詩類苑 卷之二十四
澗湖佳可遊既近復能幽林裡棲精舍山間轉去舟
鴈飛江月冷猿嘯野風秋不是迷鄉客尋奇處處留

二

共嘯人事閑佳遊野情發山門送落照湖口望昇月
林尋猿狖居水戲黿鼉穴朔風吹飛鴈江草亦云歇

秋夜遊澗湖二首

趙冬曦

政理常多暇方舟此泝洄吹笙虛洞答舉楫便風催
山暗雲猶辨潭幽月稍來清溪無數曲未盡莫先迴

二

煙藹夕微蒙幽灣賞未窮艤舟待初月褰幌招遠風

鶴聲聒幽浦漁火明暗叢東山雲壑意不謂爾來同

秋夜遊澗湖二首

張均

遠水沈西日寒沙聚夜鷗平湖乘月滿飛棹接星流
黃葉鳴悽吹蒼葭掃暗洲願移滄浦賞歸待潁川遊

二

灣潭幽意深杳靄湧寒岑石痕秋水落嵐氣夕陽沈
澄徹天爲底淵玄月作心青溪非大隱歸弄白雲尋

別澗湖

張說

念別澗湖去浮舟更一臨千峰出浪險萬木抱煙深
南郡延恩渥東山戀宿心露花香欲醉時鳥嘽餘音

涉趣皆留賞無竒不遍尋莫言山水間幽意在鳴琴

奉和別滄湖

趙冬曦

南湖羨泉石君子玩幽竒灣澳陪臨泛巖嵒共踐窺
秋風頽桂竦春景綠楊垂郢路委分竹湘濱擁去麾
枉帆懷勝賞留景惜差池水木且不棄情遊良可知

泛沔州城南郎官湖

并序

李白

乾元歲秋八月白遷於夜郎遇故人尚書郎張謂
出使夏口沔州牧杜公漢陽宰王公觴於江城之
南河樂天下之再平也方夜水月如練清光可掇
張公殊有勝槩四望超然乃顧白曰此湖古來賢

豪遊者非一而枉踐佳景寂寥無聞夫子可爲我
標之嘉名以傳不朽白因舉酒酌水號之曰郎官
湖亦猶鄭圃之有僕射陂也席上文士輔翼岑靜
以爲知言乃命賦詩紀事刻石湖側將與大別山
共相磨滅焉

張公多逸興共泛沔城隅當時秋月好不減武昌都
四座醉清光爲歡古來無郎官愛此水因號郎官湖
風流若未減名與此山俱

陪從祖濟南太守泛鵲山湖三首

李白

初謂鵲山近寧知湖水遙此行殊訪戴自可緩歸橈

二

湖濶數千里湖光搖碧山湖西正有月獨送李膺還

三

水入北湖去舟從南浦回遙看鵲山轉却似送人來

彭蠡湖上

張九齡

沿涉經大湖湖流多洗決凌晨趨北渚逗浦已西日
所適雖淹曠中流且閑逸瑰詭良復多感見乃非一
廬山直陽許孤石當陰術一水雲際飛數峰湖心出
象類何交糺形言豈深悉且知皆自然高下無相恤

過彭蠡湖

李白

謝公入彭蠡因此遊松門余方窺石鏡兼得窮江源
前賞迹可見後來道空存而欲繼風雅豈唯清心魂
雲海方助興波濤何足論青嶂憶遙月綠蘿鳴愁猿
水碧或可採金膏秘莫言余將振衣去羽化出囂煩
下潯陽城泛彭蠡寄黃判官

李白

浪動灌嬰井潯陽江上風開帆入天鏡直向彭湖東
落景轉疎雨晴雲散遠空名山發佳興清賞亦何窮
石鏡挂遙月香爐滅彩虹相思俱對此舉目與君同

自彭蠡湖初入江

張九齡

江岫殊空濶雲煙處處浮上來群噪鳥中去獨行舟
牢落誰相顧逶迤日自愁更將心問影于役復何求

彭蠡湖晚歸

白居易

彭蠡湖天晚桃花水氣春鳥飛千白點日沒半紅輪
何必爲遷客無勞是病身但來臨北望少有不愁人

彭蠡湖春望

項斯

湖亭東極望遠棹不須迴遍草新湖落連天衆鴈來
蘆洲殘照盡雲障積煙開更想鴟夷子扁舟安在哉

泛鄱陽湖

韋莊

四顧無邊鳥不飛大波驚隔楚山微紛紛雨外靈均
過瑟瑟雲中帝子歸迸鯉似梭投遠浪小舟如葉傍
斜暉鴟夷去後何人到愛者雖多見者稀

遊鏡湖寄包賀二公

孟浩然

試覽鏡湖水中流見底清不知鱸魚味但識鷗鳥情
帆得樵風送春逢穀雨晴將探夏禹穴稍背越王城
府掾有包子文章推賀生滄浪醉後唱因子寄同聲

泛鏡湖南溪

宋之問

乘興入幽棲舟行日尚低巖花候冬發谷鳥作春啼
沓嶂開天小叢篁夾路迷猶聞可憐處更在若耶溪

鏡湖西島言事寄陶校書 方干

樵獵兩三戶凋疎是近隣風雷前壑雨花木後巖春
文字不得力桑麻難救貧山禽欺穉子夜犬吠漁人
未必聖明代長將雲水親知音不赴薦何路出泥塵

鑑湖西島言事 方干

傭拙幸便荒僻地縱聽猿鳥亦何愁偶斟藥酒欺梅
雨却著寒衣過麥秋歲計有時添橡實生涯一半在
漁舟世人若便無知己應向此溪成白頭

石梁湖別陸兼 劉長卿

故人千里道滄波一年別夜上明月樓相思楚天濶

蕭蕭清秋暮嫋嫋涼風發湖色淡不流沙鷗遠還滅
煙波日已遠音問日已絕歲晏空含情江草綠芳歇

赤沙湖 劉長卿

茫茫葭菼外一望一沾衣秋水連天濶潯陽何處歸
沙鷗積暝雪川日動寒暉楚客來相問孤舟泊釣磯

永福湖和楊鄭州 賈島

積水還平岸春來引鄭溪舊渠通郭下新堰絕湖西
嵩少分明對瀟湘濶狹齊客遊隨庶子孤嶼草萋萋

石魚湖上作 并序 元結

漣泉南上有獨石在水中狀如遊魚魚凹處修之

可以賂姜魚切酒水涯四匝多歌石相連石上堪人
坐水能浮小舫載酒又能繞石魚洄流乃命湖曰
石魚湖鑄銘於湖上顯示來者又作詩以歌之

吾愛石魚湖石魚在湖裏魚背有酒樽繞魚是湖水
兒童作小舫載酒勝一杯座中令酒舫空去復滿來
湖岸多歌石石下流寒泉醉中一盃漱快意無比焉
金玉吾不須軒冕吾不愛且欲坐湖畔石魚長相對

夜讌石魚湖作

元結

風霜雖慘然出遊熙天晴登臨日暮歸置酒湖上亭
高燭照泉深光華溢軒楹如見海底日曛曛始欲生

夜寒閉牕戶石溜何清泠若在深洞中半崖聞水聲
醉人疑舫影呼指遞相驚何故有雙魚隨吾酒舫行
醉昏能誕語勸醉能忘情坐無拘忌人勿限醉與醒

題漢州西湖

房琯

高流纏峻隅城下緬丘墟決渠信浩蕩潭島成江湖
結宇依迴渚水中信可居三伏氣不蒸四達暑自徂
同人千里駕鄰國五馬車月出共登舟風生隨所如
舉麾指極浦欲極更盤紆繚繞各殊致夜盡情有餘
遭亂意不開即理還暫祛安得長晤語使我憂更除

題房公瑄漢州西湖

嚴公貺

鳳池才未盡餘思鑿西湖珍木羅修岸水光映坐隅
琴臺今寂寞竹島尚縈紆猶蘊濟川志芳名終不渝
和李德裕遊漢州房公湖二首

鄭 澣

太尉留琴聽時移重可尋徽絃一掩抑風月助登臨
榮駐青油騎高張白雪音祇言酬唱美良史記王箴

二

靜對煙波夕猶思棟宇精卧龍空有處馴鳥獨忘情
顧步襟期遠參差物象橫自宜雕樂石爽氣際青城

陪王漢州留杜綿州泛房公西湖

杜 甫

舊相思追後春池賞不稀閑庭分未到舟楫有光輝
鼓化尊絲熟刀鳴鱸縷飛使君雙皂蓋灘淺正相依

題漢州西湖

嚴公貺

西湖創置自房公心匠縱橫造化同見說鳳池推獨
步高名何事滯川中

宿鰕湖

李 白

鷄鳴發黃山嶼投鰕湖宿白雲映寒山森森似銀竹
提攜採鈿客結荷水邊沐半夜四天開星河爛人目
明晨大樓去岡隴多屈伏當與持斧翁前溪伐雲木

送友人遊梅湖

李白

送君遊梅湖應見梅花發有使寄我來無令紅芳歇
暫行新林浦定醉金陵月莫惜一鴈書音塵坐吳越

申湖

薛能

昔年依峽寺每日見申湖下淚重來此知心一已無
雨霖舟色暗崖拔木形枯舊境深相惱新春宛不殊
方來尋熟侶起去恨驚鳥忍事花何笑喧吟瀑正麓
堪憂從宦到倍遣曩懷孤上馬終回首傍人怪感吁

女墳湖

皮日休

萬貴千奢已寂寥可憐幽憤爲誰嬌須知韓重埋

骨直在芙蓉向下消

女墳湖

陸龜蒙

水平波淡遶迴塘鶴殉人沈萬古傷應是離魂雙不
得至今沙上少鴛鴦

江西題東湖

曹松

鑿出江湖思涼多
間無風觸微浪半日
秋山
客袖沙光滿船牕荻影閑時人見黃綬應笑狎鷗還
三月五日陪裴大夫泛長沙東湖

崔護

上巳餘風景芳辰集遠坳綵舟浮泛蕩綉轂下娉婷

唐詩類苑 卷之二十四
棲樹迴葱蒨笙歌入杳冥湖光迷翡翠草色醉蜻蜓
鳥弄桐花日魚翻穀雨萍從今留勝會誰看盡蘭亭

三堂東湖作

韋莊

滿塘秋水碧泓澄十畝菱花晚鏡清影動新橋橫
蝓蝓竦岸鋪芳草睡鳩鵲蟾投夜魄當湖落岳倒秋蓮入
浪生何處最添詩客興黃昏煙雨亂蛙聲

湖南曲

崔國輔

湖南送君去湖北送君歸湖裏鴛鴦鳥雙雙他自飛
南湖送徐二十七西上

劉長卿

家在橫塘曲那能萬里違門臨秋水揜帆帶夕陽飛

傲俗宜紗帽干時倚布衣獨將湖上月相逐去還歸

送盧判官南湖

劉長卿

漾舟仍載酒愧爾意相寬草色南湖綠松聲小署寒
水禽前後起

一作出

花嶼往來看已作滄洲調無心戀

一官

宿懷仁縣南湖寄東海荀處士

劉長卿

向夕欽微雨晴開湖上天離人正惆悵新月愁嬋娟
佇立白沙曲相思滄海邊浮雲自來去此意誰能傳
一水不相見千峰隨客船寒塘起孤鴈夜色分鹽田

時復一延首憶君如眼前

姑蘇城南湖陪曹使君遊 羅 隱

水蓼花紅稻穗黃使君蘭棹泛迴塘倚風藻荇先開
路迎旆鳥鷺盡着行手裏兵符神與術腰間金印綵
為囊少年太守勲庸盛應笑燕臺兩鬢霜

南湖

溫庭筠

湖上微風入檻涼翻翻菱荇滿迴塘野舫着岸偎春
草水鳥帶波飛夕陽蘆葉有聲疑霧雨浪花無際似
瀟湘飄然蓬艇東遊客盡日相看憶楚鄉

侯郎中新置西湖

方 干

遠近利民因智力周迴潤物象心源菰蒲縱感生成
惠鱸鮪那知廣大恩瀲灩清暉吞半郭縈紆別派入
遙村沙泉遶石通山脉岸木粘萍是浪痕已見澄來
連鏡底兼知極處浸雲根波濤不起時方泰舟楫徐
行日易昏煙霧未應藏島嶼鳥鷺亦解避旌旛雖云
桃葉歌還醉却被荷花笑不言孤鶴必應思鳳沼凡
魚豈合在龍門能將盛事添元化一夕機謨萬古存

早春西湖閑遊悵然興懷憶與微之同賞因
思在越官重事殷鏡湖之遊或恐未暇偶
成十八韻寄微之 白居易

上馬復呼賓湖邊景氣新歌絃三數事騎從十餘人
立換登山屐行攜漉酒巾逢花看當妓遇草坐爲茵
西日籠黃柳東風蕩白蘋小橋裝鴈齒輕浪斃魚鱗
畫舫牽徐轉銀船酌慢巡野情遺世累醉態任天真
彼此年將老平生分最親高天從所願遠地得爲鄰
雲樹分三驛煙波限一津翻嗟寸步隔却厭尺書頻
浙右稱雄鎮山陰委重臣貴垂長紫綬榮駕大朱輪
出動刀槍隊歸生道路塵鴈驚弓易散鷗怕鼓難馴
百吏瞻相百千夫捧擁身自然閒興少應負鏡湖春
同宇文晁尚書之甥崔彘司業之孫尚書之

子重泛鄭監前湖

杜甫

郊扉俗遠長幽寂野水春來更接連錦席淹留還出
浦葛巾欹側未回舡尊當霞綺輕初散棹拂荷珠碎
却圓不但習池歸酪酏君看鄭谷去寅緣

泛曲阿後湖簡同遊諸公

劉長卿

元氣浮積水沉沉深不流春風萬頃綠映帶至徐州
爲客難適意逢君方暫遊寅緣白蘋際日暮滄浪舟
渡口微月進林西殘雨收水雲去仍濕沙鶴鳴相留
且習子陵隱能忘生事憂此中深有意非爲釣魚鉤

後湖

元稹

荆有泥濘水在荆之邑鄂鄂前水在後謂之為後湖
環湖十餘里歲積潢與汚臭腐魚鼈死不植菰與蒲
鄭公理三載嚴司其理用煦愉歲稔民四至隘屢亦
隘衢公乃署其地為民先矢謨人人儻自為我亦不
庀徒下俚得聞之各各相俞俞提攜翁及孫捧戴婦
與姑壯者負礫石老亦捽茅芻斤磨片片雪椎隱連
連珠朝餐布庭落夜宿完戶樞鄰里近相告親戚遠
相呼驚者自為驚酷者自為酷鷄犬豐中市人民岐
下都百年廢滯所一旦奧浩區我實司水土得為官
事無人言賤事貴貴直不貴諛此實公所小安用歌

袴襦答云潭及廣以至鄂與吳萬里盡澤國居人皆
墊濡富者不容蓋貧者不庇軀得不歌此事以我為
楷模

湖中寄王侍御

丘為

日日湖水上好登湖上樓終年不向郭過午始梳頭
賞亦愛杯酒得無相獻酬小童能膾鯉少妾事蓮舟
每有江南信仍期後月遊方春轉搖蕩孤興時淹留
驄馬真傲吏翛然無所求晨起玉階下心許滄江流
少別如昨日何言經數秋應知方外事獨往非悠悠

湖中

顧况

青草湖邊日色低
黃茅嶂裏鷓鴣啼
丈夫飄泊今如此
一曲長歌楚水西

湖中自照

白居易

重重照影看容鬢
不見朱顏見白絲
失却少年無覓處
泥他湖水欲何爲

秋日湖上

薛瑩

落日五湖遊
煙波處處愁
沉浮千古事
誰與問東流

湖上言事寄長城喻明府

方干

吟霜與卧雪
此興亦甘貧
吹剪落翠羽
垂絲牽錦鱗
滿湖風撼月
半日雨藏春
却笑縈簪組
勞心遠字人

戲題湖上

常建

湖上老人坐磯頭
湖裏桃花水却流
竹竿嫋嫋波無際
不知何者吞吾鈎

春題湖上

白居易

湖上春來似畫圖
亂峰圍繞水平鋪
松排山面千重翠
月點波心一顆珠
碧毯線頭抽早稻
青羅裙帶展新蒲
未能拋得杭州去
一半勾留是此湖

同金壇令武平一遊湖三首

儲光羲

朝來仙閣聽絃歌
暝入花亭見綺羅
池邊命酒憐風

月浦口回船惜芰荷

朦朧竹影蔽巖扉淡蕩荷風飄舞衣舟尋綠水宵將
半月隱青林人未歸

花潭竹嶼傍幽溪畫楫浮空入夜溪芰荷覆水船難
進歌舞留人月易低

陪睦州胡中丞泛湖

方干

仙舟仙樂醉行春上界稀逢下界人綺繡峰前聞野
鶴旌旗影裏見遊鱗澄潭澈底齊心鏡雜樹含芳讓
錦茵凡許從容誰不幸就中光顯是州民

答微之見寄

白居易

可憐風景浙東西先數餘杭次會稽禹廟未勝天竺
寺錢湖不羨若耶溪擺塵野鶴春毛暖拍水沙鷗濕
翅佞更對雪樓君愛否紅欄碧甃點銀泥

誰無泉石趣朝下少同過貪勝覺程遠愛閒經宿多
片沙留白鳥高木引青蘿醉把漁竿去殷勤藉岸莎

題稚川山水

戴叔倫

松下茅亭五月涼汀沙雲樹暗蒼蒼行人無限秋風
思隔水青山似故鄉

暖川

李益

胡風凍合鷓鴣泉牧馬千群逐暖川塞外征行無盡
日年年移帳雪中天

江州望廬川

羅隱

東南蒼翠何崔嵬橫流一望幽抱開影寒已冷水底

去脚濶欲過湖心來深處不堪容鬼怪暗中兼恐有
風雷仙人往往今誰在紅杏花香重首迴

浦

秋浦歌三首

李白

秋浦長似秋蕭條使人愁客愁不可度行上東大樓
正西望長安下見江水流寄言向江水汝意憶儂否
遙傳一掬淚爲我達揚州

千千石楠樹萬萬女貞林山山白鷺滿澗澗白猿吟
君莫向秋浦猿聲碎客心

秋浦猿夜愁黃山堪白頭青溪非隴水翻作斷腸流

欲去不得去薄遊成久遊何年是歸日雨淚下孤舟

秋浦歌十四首

李白

秋浦錦駝鳥人間天上稀山鷄羞綠水不敢照毛衣

二

兩鬢入秋浦一朝颯已衰猿聲催白髮長短盡成絲

三

秋浦多白猿超騰若冰雪牽引條上見飲弄水中月

四

愁作秋浦客強看秋浦花山川如剡縣風日似長沙

五

醉上山公馬寒歌寧戚牛空吟白石爛淚滿黑貂裘

六

秋浦千重嶺水車嶺最奇天傾欲墮石水拂寄生枝

七

江祖一片石青天掃畫屏題詩留萬古綠字錦苔生

八

邏人橫鳥道江祖出魚梁水急客舟疾山花拂面香

九

水如一疋練此地卽平天耐可乘明月看花上酒船

十

綠水淨素月月明白鷺飛郎聽採菱女一道夜歌歸

十一

爐火照天地紅星亂紫煙報郎明月夜歌曲動寒川

十二

白髮三千丈綠愁似个長不知明鏡裏何處得秋霜

十三

秋浦田舍翁採魚水中宿妻子張白鵬結罟映深竹

十四

桃波一步地了了語聲聞聞與山僧別低頭禮白雲

劉郎浦口號

呂溫

吳蜀成婚此水潯明珠步障幄黃金誰將一女輕天下欲換劉郎鼎峙心

發劉郎浦

杜甫

挂帆早發劉郎浦疾風颯颯昏亭午舟中無日不沙塵岸上空村盡豺虎十日北風風未迴客行歲晚猶相催白頭厭伴漁人宿黃帽青鞋歸去來

宿空舫峽青樹村浦

陳子昂

的的明月水啾啾寒夜猿客思浩方亂洲浦寂無喧憶作千金子寧知九逝魂虛聞事朱闕結綬驚華軒委別高堂愛窺覲明主恩今成轉蓬去嘆息復何言

乘潮至漁浦

陶翰

艤棹乘早潮潮來如風雨嶂高忽已界峰暗莫及覩
崩騰心爲失浩蕩目無主風停浪始開漾漾入漁浦
雲景共澄霽江山相含吐倬然造化工此事從終古
流沫誠足誠高歌調易苦頗因忠信全客念猶栩栩

新林浦阻風寄友人

李白

潮水定可信天風難與期清晨西北轉薄暮東南吹
以此難挂席佳期益相思海月破圓影菰蔣生綠池
昨日北湖梅開花已滿枝今朝東門柳夾道垂清絲
歲物忽如此我來定幾時紛紛江上雪草草客中悲

明發新林浦空吟謝眺詩

宿鑿石浦

杜甫

早宿賓從勞仲春江山麗飄風過無時舟艤不敢繫
白塘澹暮色日沒衆星擘缺月殊未生青燈死分翳
窮途多俊異亂世少恩惠鄙夫亦放蕩草草頻卒歲
斯文憂患餘聖哲垂彖繫

南浦別

白居易

南浦淒淒別西風嫋嫋秋一看腸一斷好去莫迴頭

雙楓浦

杜甫

輟棹青楓浦雙楓舊已摧自驚衰謝力不道棟梁材

浪足浮紗帽皮須截錦苔江邊地有主暫借上天迴
宿范浦 崔國輔

月暗湖又落西陵渡暫停村煙和海霧舟火亂江星
路轉定山遶塘連范浦橫鴟夷近何去空山臨滄溟
晚投江澤浦即事呈柳兵曹泥

耿 漳

落日過重霞輕煙上遠沙移舟衝荇蔓轉浦入蘆花
斷岸迂來客連波漾去槎故鄉何處在更道向天涯

錦浦

鄭 谷

流落夜淒淒春寒錦浦西不甘花逐水可惜雪成泥

病眼嫌燈近離腸賴酒迷憑君囑鴟鳩莫向五更啼

狄浦

羅 隱

晴川倚落暉極目思依依野色寒來淺人家亂後稀
久貧身不達多病意長違還有漁舟在時時夢裏歸

宿讓河驛浦

陳子昂

沿流辭北渚結纜宿南州岸合昏初夕迴塘暗不留
臥聞塞鴻斷坐聽峽猿愁沙浦明如月汀葭晦若秋
不及能鳴鴈徒思海上鷗天河殊未曉滄海信悠悠

南浦篇

孟 郊

南浦桃花亞水紅水邊柳絮由春風鳥鳴啾啾煙濛

唐詩類苑 卷之三十五
濛自從遠送對悲翁此翁已與少年別唯憶深山深
谷中

蓮浦謠

温庭筠

鳴橈軋軋溪溶溶廢綠平煙吳苑東水清蓮媚兩相
向鏡裏見愁愁更紅白馬金鞍大堤上西江日夕多
風浪荷心有露似驪珠不是真圓亦搖蕩

獨樹浦雨夜寄李六郎中

白居易

忽憶兩家同里巷何曾一處不追隨閒遊預筭分朝
日靜語多同待漏時花下放狂衝黑飲燈前起坐徹
明碁可知風雨孤舟夜蘆葦叢中作此詩

溪

清溪行

李白

清溪清我心水色異諸水借問新安江見底何如此
人行明鏡中鳥度屏風裏向晚猩猩啼空悲遠遊子

清溪館作

錢 戴

指途清溪裏左右唯深林雲蔽望鄉處雨愁為客心
遇人多物役聽鳥時幽音何必滄浪水庶茲浣塵襟

池州清溪

杜 牧

美溪終日到黃昏照數秋來白髮根何物賴君千遍
洗筆頭塵土漸無痕

清溪

王維

言入黃花川每逐青溪水隨山將萬轉趨途無百里
聲喧亂石中色淨深松裏漾漾泛菱荇澄澄映葭葦
我心素已閒清川澹如此請留盤石上垂釣將已矣

宣城青溪

李白

青溪勝桐廬水木有佳色山貌日高古石容天傾側
綵鳥昔未名白猿初相識不見同懷人對之空歎息

汎茅山東溪

儲光羲

清晨登仙峰峰遠行未極江海霽初景草木含秋色
而我任天和此時聊動息望鄉白雲裏發棹清溪側

松栢生深山無心自貞直

宿太白東溪李老舍寄弟姪

岑參

渭上秋雨過北風何騷騷天晴諸山出太白峰最高
主人東溪老兩耳生長毫遠近知百歲子孫皆二毛
中庭井欄上一架獼猴桃石泉飯香粳酒甕開新糟
愛茲田中趣始悟世上勞我行有勝事書此寄爾曹

尋東溪還湖中作

劉昫

出山更回首日暮清溪深東嶺新別處數猿呌空林
昔遊初有跡此路還獨尋幽興方在在歸懷復爲吟

雲峰勞前意湖水成遠心望望已超越坐鳴舟中琴
終南東溪中作

岑參

溪水碧於草潺潺花底流沙平堪濯足石淺不勝舟
洗藥朝與暮釣魚春復秋興來從所適還欲向滄洲

東溪言事寄于丹

方干

日月晝夜轉年光難駐留軒窗纔過雨枕簟卽知秋
天際鴈行出溪中虹影收唯君壯心在應笑臥滄洲
緱氏尉沈興宋置酒南溪留贈

王昌齡

林色與溪古深篁引幽翠山樽在漁舟棹月情已醉

始窮清源口壑絕人境異春泉滴空崖萌草坼陰地
久之風榛寂遠聞樵聲至海鴈時獨飛永然滄洲意
古時青冥客滅迹淪一尉五子躊躇心豈其紛埃事
緱岑信所尅濟北余乃遂齊物可任今息肩理猶未
卷舒形性表脫畧賢哲議仲月期角巾飯僧嵩陽寺

和處州韋使君新開南溪 朱慶餘

地里光圖讖樵人共說深悠然想高躅坐使變荒岑
䟽鑿因殊舊亭臺亦自今靜容猿暫下閒與鶴同尋
轉旆馴禽起褰帷瀑溜侵石稀潭見底嵐暗樹無陰
躋險難通屐攀棲稱抱琴雲風開物意潭水識人心

攜榼巡花遍移舟惜景沈世嫌山水僻誰伴謝公吟
和處州嚴郎中遊南溪 朱慶餘

四望非人境從前洞穴深潭清蒲遠岸嵐積樹無陰
看草初移屐捫蘿忽並簪世嫌山水僻誰伴謝公吟
西溪 李商隱

近郭青溪好誰堪共酒壺苦吟防柳惲多淚怯楊朱
野鶴隨君子寒松揖大夫天涯長病意岑寂勝歡娛
夜出西溪 李商隱

東府憂春盡西溪許日曛月澄新漲水星見欲銷雲
柳好休傷別松高莫出群軍書雖倚馬猶未當能文

駐蹕華下同年司封員外從翁許共游西溪

久違前契戲成寄贈 鄭谷

北渚牽吟興西溪爽共游指期承禁馬

故事初入內庭恩借飛龍

馬無暇狎沙鷗縱目懷青島澄心想碧流明公非不

愛應待汎龍舟

偶遊龍門北溪忽懷驪山別業呈諸留守

韋嗣立

幽谷杜陵邊風煙別幾年偶來伊水曲溪嶂各依然
傍浦憐芳樹尋崖愛綠泉嶺雲隨馬足山鳥向人前
地合心俱靜言因理自玄短才叨重寄尸祿愧妨賢

唐詩類苑 卷之三十一
每揖挂冠侶思從初服旋稻梁仍欲報歲月坐空捐
助獄無纖芥輸溟謝未涓還悟北轅矢方求南澗田

奉詔龍門北溪作

張說

石澗泉虛落松厓路曲迴聞君北溪下想像南山隈
近念鼎門別遙思雲障陪不同竒觀往空覩斯文來
歲候寒初變春芳前未開黃蕤裊岸柳紫萼折春梅
盡室茲遊翫盈門幾樂哉嗟遊洛陽陌夢詣建章臺
野失巢由性朝非元凱才布懷欽遠近幽意日塵埃

奉詔龍門北溪作

崔泰之

關塞臨伊水驪山枕灞川俱臨隱路側同在帝城邊

謝公兼出處攜妓玩林泉鳴騶噴梅雪飛蓋曳松煙
聞琴幽谷裏看奕古巖前落月低幃帳歸雲繞管絃
叨榮慚北闕微尚愛東田寂寞灰心盡蕭條塵事捐
朝思登嶰絕夜夢美潺湲宿懷南澗意况睹北巖篇

奉詔龍門北溪作

崔日知

夙齡秉微尚中年忽有隣以茲山水癖遂得狎通人
迨我南京道聞君北業新巖前窺石鏡河畔踏芳茵
旣憐伊浦渌復憶灞池春連詞謝家子同懽冀野賓
趣閒魚共樂情洽鳥來馴誰念昔遊者祗命獨留秦
蕭條潁陽戀冲漠漢陰真無由陪勝躅空此翫書筠

奉詔龍門北溪作

魏知古

有美朝爲貴幽尋地自偏
踐臨伊水內想望灞池邊
是遇皆新賞茲遊若舊年
藤蘿隱路接楊柳御溝聯
道愜神情王機忘俗理
捐遂初誠已重兼濟實爲賢
跡是東山戀心唯北闕前
顧慙經拾紫多謝賦思玄
未躡中林步空乘上藻傳
陽春和已寡扣寂意徒然

自湯還都經龍門北溪贈張左丞崔禮部崔

光祿有序

韋嗣立

僕自湯還都經龍門北溪莊張左丞崔禮部崔光
祿並枉垂顧數公宿敦道義雅尚林壑謂急于幽

尋故此命駕遂不知別有勝賞偶然相過寒暄未
周神意已往雲霞之志茂而不存逸轡放驅清塵
徒企耿難不已而贈是詩

棲閒有愚谷好事枉前軒
樹接前驅擁巖傳後騎喧
褰簾出野院植杖候柴門
旣拂林下席仍攜池上樽
深期契幽賞實爲展懽言
末眷誠未易佳時遊更敦
俄看肅儔侶各已共飛騫
延睇盡朝日長懷通夜魂
空聞岸竹動徒見浦花繁
多愧春鶯曲相求意獨存
訓韋祭酒自湯還都經龍門北溪見贈

張說

聞君湯井至瀟灑憇郊林拂曙攜清賞披雲覲綠岑
歡言遊覽意欵曲望歸心是日期嘉客同山忽異尋
桃源花路轉楊柳澗門深汎舟伊水漲繫馬香樹陰
繁絃弄水族嬌吹狎沙禽春滿河色媚景斜嵐氣侵
懷仁殊未遠重德匪專臨來藻敷幽思連詞報所欵

春汎若耶

綦毋潛

幽意無斷絕此去隨所偶晚風吹行舟花落入溪口
際夜轉西壑隔山望南斗潭煙飛溶溶林月低向後
生事且瀾漫願爲持竿叟

汎若耶溪

丘爲

結廬若耶裏左右若耶水無日不釣魚有時向城市
溪中水流急渡口水流寬每得樵風便往來殊不難
一川草長綠四時那得辨裋褐衣妻兒餘糧及鷄犬
日暮鳥雀稀稚子呼牛歸住處無隣里柴門獨掩扉
耶溪書懷寄劉長卿員外 馬 戴一作秦系
時人多笑樂幽棲晚起閒行獨杖藜雲色卷舒前後
嶺藥苗新舊兩三畦偶逢野果將呼子屢折荆釵亦
爲妻擬共釣竿長往復嚴陵灘上勝耶溪

入若耶溪

崔顥

輕舟去何疾已到雲林境起坐魚鳥間動搖山水影

巖中響自答溪裏言彌靜事事令人幽停橈向餘景
耶溪汎舟 孟浩然

落景餘清輝輕橈弄溪渚澄明愛水物臨泛何容與
白首垂釣翁新妝浣紗女相看似相識脉脉不得語
若耶溪逢孔九 綦毋潛

相逢此溪曲勝託在煙霞潭影竹間動巖陰簷外斜
人言上皇代犬吠武陵家借問淹留日春風滿若耶

武陵卽事

孟浩然

川暗夕陽盡孤舟泊岸初嶺猿相叫嘯潭影似空虛
就枕滅明燭扣船聞夜漁鷄鳴問何處人物是秦餘

武陵汎舟

孟浩然

武陵川路狹前棹入花林莫測幽源裏仙家信幾深
水迴青嶂合雲渡綠溪陰坐聽閒猿嘯彌清塵外心

皇甫嶽雲溪雜題五首

王維

鳥鳴澗

人閒桂花落夜靜春山空月出驚山鳥時鳴春澗中

蓮花塢

日日採蓮去洲長多暮歸弄篙莫濺水畏濕紅蓮衣

鷓鴣堰

乍向紅蓮沒復出清浦颺獨立何離襍銜魚古查上

上平田

朝耕上平田暮耕上平田借問問津者寧知沮溺賢

萍池

春池深且廣會待輕舟迴靡靡綠萍合垂楊掃復開

藍田溪雜詠二十二首

錢起

望山登春臺日盡趣難極晚景下平阡花際霞峰色

右登臺

靜宜樵隱度遠與車馬隔有時行樂來喜遇歸山客

右板橋

片霞照僊井泉底桃花紅那知幽石下不與武陵通

右石井

引蔓出雲樹垂綸覆窠鶴幽人對酒時苔上閒花落

右古藤

池上靜難厭雲間欲去晚忽背夕陽飛乘興清風遠

右晚歸鷺

幾轉到青山數重度流水秦人入雲去知向桃源裏

右洞仙謠

春畦生百藥花葉香初霽好客似風光偏來入叢蕙

右藥圃

靜與溪色連幽宜松雨滴誰知古石上不染世人跡

右石上苔

遠岫見如近千里一窻裏坐來石上雲乍謂壺中起

右窻裏山

暗歸草堂靜半入花園去有時載酒來不與清風遇

右竹間路

幽鳥清漣上興來看不足新篁壓水低昨夜鴛鴦宿

右竹嶼

穿雲來自遠激砌流偏駛能資庭戶幽更引海禽至

右砌下泉

乍依菱蔓聚盡向蘆花滅更喜好風來數片翻晴雪

右戲鷗

風送出山鐘雲霞度水淺欲知聲盡處鳥滅寥天遠

右遠山鐘

永日興難忘掇芳春陂曲新晴花枝下愛此苔水綠

右東陂

一作憶皇子陂

臨池構杏梁待客歸煙塘水上寒簾好蓮開杜若香

右池上亭

有意蓮葉間瞥然下高樹擘波得潛魚一點翠光去

右銜魚翠鳥

幽石生芙蓉百花慚美色遠笑越溪女聞芳不可識

右石蓮花

亂石跳素波寒聲聞幾處
颼颼暝風引散出空林去
右潺湲聲

雖因朔風至不向瑤臺側
唯助苦寒松偏明後凋色
右松下雪

田鶴望碧霄無風亦自舉
單飛後片雲早晚及前侶
右田鶴

家住鳳城南門臨古陂
曲時憐上林鴈半入池塘宿
右題南陂

白雲溪

吳鞏

山逕入修篁深林敞日光
夏雲生嶂遠瀑水引溪長
秀跡逢皆勝清氛坐轉涼
回看玉罇夕歸路賞前忘

浙幕李端公汎建溪

黃滔

越城吳國結良姻交發芙蓉幕
內賓自顧幽沈槐省
跡得陪清顯諫垣臣分題曉
並蘭舟遠對坐宵聽月
狄頻更愛延年津上過一雙
神劍是龍鱗

汎五雲溪

許渾

此溪何處路遙問白髯翁
佛廟千巖裏人家一島中
魚傾荷葉露蟬噪柳林風
急瀨鳴車軸微波漾釣筒
石苔縈障綠山果拂舟紅
更就前溪宿村橋與剡通

月溪與幼遐君貺同遊

時二子還城

韋應物

岸篠覆迴溪迴溪曲如月沈沈水容綠寂寂流鶯歇
一作鶯初歇淺石方凌亂遊禽時出沒半雨夕陽霏綠源
雜花發明晨重來此同心應已闕

說洄溪招退者

元結

長松亭亭滿四山山間乳竇流清泉洄溪正在此山
裏乳水松膏常灌田松膏乳水田肥良稻苗如蒲米
粒長糜色如珈玉液酒酒熟猶聞松節香溪邊老翁
年幾許長男頭白孫嫁女問言只食松田米無樂無

荒向人語浯溪石下多泉源盛暑大寒冬大温屠蘇
宜在水中石洄溪一曲自當門吾今欲作洄溪翁誰
能住我舍西東勿憚山深與地僻羅浮尚有葛仙翁
問寇校書雙溪

王維

君家少室西爲復少室東別來幾日今春風新買雙
溪定何似餘生欲寄白雲中

春陪商州裴使君遊石娥溪

李白

裴公有仙標拔俗數千丈澹蕩滄洲雲飄飄紫霞想
剖竹商洛間政成心已閒蕭條出世表冥寂閉玄關

唐言類考 卷之三十五
我來屬芳節解榻時相悅褰帷對雲峰揚袂指松雪
斲出東城邊遂遊西巖前橫天聳翠壁噴壑鳴紅泉
尋幽殊未歇愛此春光發溪傍饒名花石上有好月
命駕歸去來露華生翠苔淹留惜將晚復聽清猿哀
清猿斷人腸遊子思故鄉明發首東路此懽焉可忘

入唐峽

嚴維

嘯終萬籟起吹去當溪雲環嶼或明昧遠峰尚氛氲
雨新翠葉發夜早玄象分金澗流不盡入山深更聞

初發曲江谿中

張九齡

溪流清且深松石復陰臨正爾可嘉處胡爲無賞心

我由不忍別物亦有緣侵自匪嘗行邁誰能知此音

泥谿

王勃

弭棹凌奔壑低鞭躡峻岐江濤出岸險峰磴入雲危
溜急船文亂巖斜騎影移水煙籠翠渚山照落丹崖
風生蘋浦葉露泣竹潭枝汎水雖云美勞歌誰復知

遊越溪

鄭紹

溪水碧悠悠猿聲斷客愁漁潭逢釣楫月浦值孤舟
訪泊隨煙火迷途指斗牛今宵越鄉意還取醉忘憂

剡溪行寄新別

朱放

潺湲寒溪上自此成離別回首望歸人移舟逢暮雪

頻行識草樹漸老傷年髮唯有白雲心為向東山月
處州洞溪
方干

氣象四時清無人盡得成衆山寒疊翠兩派綠分聲
坐月何曾夜聽松不似晴混元融結後便有此溪名

茗溪訓梁耿別後見寄
劉長卿

清川永路何極落日孤舟解攜鳥向平蕪遠近人隨
流水東西白雲千里萬里明月前溪後溪惆悵長沙
謫去江潭芳草萋萋

雪溪晚泊寄裴庶子
羅隱

溪風如扇雨如絲閒步閒吟柳惲詩杯酒疎狂非曩

日野花狼籍似當時道窮謾有劉生感才急應無借
寇期滿眼雲山莫相笑與君俱是受深知

寒溪九首
孟郊

露洗水色盡寒溪見纖鱗幸臨虛空鏡照此殘悴身
潛滑不自隱露底瑩更新豁如君子懷曾是危陷人
始明淺俗心夜結朝已津淨漱一掬碧遠消千慮塵
始知泥步泉莫與山源鄰

二

洛陽岸邊道孟氏莊前溪舟行素冰折聲作青瑤嘶
綠水結綠玉白波生白珪明明寶鏡中物物天照齊

尺步下危曲攀枯聞孀啼霜芬稍消歇凝景微茫齊
癡坐直視聽顛行失蹤蹊岸童斲棘勞語言多悲悽

三

曉飲一盃酒踏雪過清溪波瀾凍爲刀剗割鳧與鷺
宿羽皆翦棄血聲沈沙泥獨立欲何語默念心酸嘶
凍血莫作春作春生不齊凍血莫作花作花發孀啼
幽幽棘針村凍死難耕犁

四

篙工碓玉星一路隨迸螢朔凍哀徹底獠饒咏潛鯉
冰齒相磨嚙風音酸鐸鈴清悲不可逃洗出纖悉聽

碧激卷已盡彩

飛飄零下躡滑不定上樓折難停

哮嗶呷哺冤仰訴何時寧

五

一曲一直水白龍何鱗鱗凍颯雜碎號壑音坑谷辛
柝榆吃無力飛走更相仁猛弓一折弦餘喘爭來賓
大巖此之立小殺不復陳

六

皎皎何皎皎氤氳復氤氳瑞晴刷日月高碧開星辰
獨立兩脚雪孤吟千慮新天讒徒昭昭箕舌虛斷斷
堯聖不聽汝孔微亦有臣諫書竟成章古義終難陳

七

因凍死得食殺風仍不休以兵爲仁義仁義生刀頭
刀頭仁義腥君子不可求波瀾抽劍水相劈如仇讐
尖雪入魚心魚心明恹恹恍如魍魎說似訴割切由
誰使異方氣入此中土流翦盡一月春閉爲百谷幽
仰懷新霽光下照疑憂愁

八

溪老哭甚寒涕泗水珊珊飛死走死形雪裂紛心肝
劍刃凍不割弓絃彊難彈嘗聞君子武不食天殺殘
斲玉掩骼齒吊瓊哀闌干

九

溪風擺餘凍溪景銜明春玉消花滴滴虬解光鱗鱗
懸步下清曲消期濯芳津千里冰裂處一勺暖亦仁
凝精牙相洗漪漣競將新忽如劍瘡盡初起百戰身

蘭溪

在蘄州西

杜牧

蘭溪春盡碧泱泱映水蘭花雨發香楚國大夫憔悴
日應尋此路去瀟湘

蘭溪棹歌

戴叔倫

涼月如眉挂柳灣越中山色鏡中看蘭溪三日桃花
雨半夜鯉魚來上灘

入少密溪

沈佺期

雲峰苔壁遶溪斜，江路香風夾岸花。
木密不言通鳥道，鷄鳴始覺有人家。
人家更在深巖口，澗水周流宅前後。
遊魚瞥瞥雙鈞童，伐木丁丁衆樵叟。
自言避喧非避秦，薜衣耕鑿帝堯人。
相留且待鷄黍熟，夕臥深山蘿月春。

題贈鄭秘書徵君石溝溪居

白居易

鄭君得自然，虛白生心胸。
吸彼沆瀣精，凝爲冰雪容。
大君貞元初，求賢致時雍。
蒲輪入翠微，迎下天台峰。

赤城別松喬黃閣交夔龍，
俛仰受三命，從容辭九重。
出籠鶴翩翩，歸林鳳噉噉。
在火辨良玉，經霜識貞松。
新居寄楚山，山碧溪溶溶。
丹竈燒煙煜，黃精花丰茸。
蕙帳夜瑟瑟，澹桂罇春酒。
濃時人不到，處苔石無塵。
蹤我今何爲者，趨世身龍鍾。
不向林壑訪，無由朝市逢。
終當解纓網，卜築來相從。

奉陪侍中遊石筍溪十二韻

盧綸

朝日照靈山，山溪浩紛錯。
圖秦無舊記，紀禹應新鑿。
雙壁瀉天河，一峰吐蓮萼。
潭心亂雪卷，巖腹繁珠落。

彩蛤攢錦囊芳蘿嫋花索猿群曝陽嶺龍穴腥陰壑
靜得漁者言閒聞洞仙博歌松倚朱幃廣石屯油幕
國泰事留侯山春縱康樂間關殊狀鳥爛熳無名藥
欲驗少君方還吟大隱作旌幢不可駐古塞新沙漠

夏初雨後尋愚溪

柳宗元

悠悠雨初霽獨繞清溪曲引杖試荒泉解帶圍新竹
沈吟亦何事寂寞固所欲幸此息營營嘯歌靜炎燠

雨後曉行獨至愚溪北池

柳宗元

宿雲散洲渚曉日明村塢高樹臨清池風驚夜來雨
予心適無事偶此成賓主

和皇甫判官遊琅琊溪

孟郊

山中琉璃境物外琅琊溪房廊逐巖壑道路隨高低
碧瀨漱白石翠煙含青蜺上客暫遊踐意欲忘簪珥
樹杪燈火夕雲端鐘梵齊時同雖可仰跡異難相攜
唯當清宵夢髣髴願攀躋

訓元秘書晚出藍溪見寄

錢起

野興引才子猶行幽徑遲雲留下山處鳥靜出溪時
拙宦不忘隱歸休長在茲知音倘相訪炊黍掃茅茨

子初全溪作

李商隱

全溪不可到况復盡餘醅漢苑生春水昆池換劫灰

戰蒲知鴈唳，陂月覺魚來。清興恭聞命，言詩未敢迴。
西蜀淨衆寺松溪八韻兼寄小筆崔處士

鄭谷

松因溪得名，溪吹荅松聲。繚繞能穿寺，幽竒不在城。
寒煙齊後散，春雨夜中平。染岸蒼苔古，翹沙白鳥明。
澄分僧影瘦，光徹客心清。帶梵侵雲響，和鐘擊石鳴。
澹烹新茗爽，暖泛落花輕。此景吟難盡，憑君盡入京。
守或可重陽更一來

九日題塗谿

白居易

浯溪

鄭谷

湛湛清江疊疊山，白雲白鳥在其間。漁翁醉睡又醒
睡，誰道皇天最惜閒。

送客汎五溪

韓翃

南過猿聲一逐臣，回看秋草淚沾巾。寒天暮雪空山
裏，幾處蠻家是主人。

題金家竹溪

王建

少年因病離天仗，乞得歸家自養身。買斷竹溪無別
主，散分泉水與新隣。山頭鹿下長驚犬，池面魚行不
怕人。鄉使到來一作門常歎語，還聞世上有功臣。

題裴處士碧虛溪居

王建

鳥聲真似深山裏平地人間自不同
春圃紫芹長卓卓暖泉青草一叢叢
松臺前後花皆別竹嶮高低水盡通
細問來時從近遠溪名載入縣圖中

冉溪

柳宗元

少時陳力希公侯許國不復為身謀
風波一跌逝萬里壯心瓦解空縲囚
縲囚終老無餘事願卜湘西冉溪地
却學壽張樊敬侯種漆南園待成器

溪居

柳宗元

久為簪組累幸此南夷謫閒依農圃
隣偶似山林客

曉耕翻露草夜榜

北孟切

響溪石來往不逢人長歌楚天碧

天碧

溪上

顧况

採蓮溪上女舟小怯搖風驚起鴛鴦
宿水雲撩亂紅

雙聲溪上思

陸龜蒙

溪空唯容雲木密不隕雨迎魚隱映
間妾問謳鴉榜

雙聲溪上思

皮日休

疎杉低通灘冷鷺立亂浪草彩欲夷
猶雲容空澹蕩

溪上

杜甫

峽內淹留客溪邊四五家古苔生迤
地秋竹隱疎花

塞俗人無井山田飯有沙西江使船至時復問京華
溪上行 温庭筠

綠塘漾漾煙濛濛張翰此來情不窮雪羽襤褸立倒
影金鱗潑刺跳晴空風翻荷葉一向白雨濕蓼花干
穗紅心羨夕陽波上客片時歸夢釣船中

溪上春望

羅鄴

無端溪上看蘭橈又是東風斷柳條雙鬢多於愁裏
鑷四時須向醉中銷行人駿馬嘶香陌獨我殘陽倚
野橋吟水咏山心未已可能終不勝漁樵

清溪路中寄諸公

崔備

偏郡隔雲岑迴溪路更深少留攀桂樹長渴望梅林
野筍資公膳山花慰客心別來無信息可謂并瓶沈
訓萬八賀九雲門下歸溪中作

孫逖

晚從靈境出林壑曙雲飛稍覺清溪盡迴瞻盡刹微
獨園餘興在孤棹宿心違更憶登攀處天香盈袖歸
溪行卽事 僧靈一

近夜山更碧入林溪轉清不知伏牛地潭洞何縱橫
曲岸煙初合平湖月未生孤舟屢失道但聽秋泉聲
溪行寄京師故人道侶 張祐

唐言類考 卷之三十三
白日長多事清溪偶獨尋雲歸秋水濶月出夜山深
坐想天涯去行悲澤畔吟東郊故人在應笑未抽簪

谿行寄王震

張九齡

山氣朝來爽谿流自向清遠心何處愜閒棹此中行
叢桂林間待群鷗水上迎徒然適我願幽獨爲誰情

汎溪

杜甫

落景下高堂進舟汎迴溪誰謂築居小未盡喬木西
遠郊信荒僻秋色有餘淒練練峰上雪纖纖雲表霓
童戲左右岸罟弋畢提攜翻倒荷芰亂指揮逕路迷
得魚已割鱗採藕不洗泥人情逐鮮美物賤事已睽

吾村靄冥姿異舍鷄亦棲蕭條欲何適出處庶可齊
衣上見新月霜中登故畦濁醪自初熟東城多鼓鼙

汎溪

朱慶餘

曲渚迴花舫生衣臥向風鳥飛溪色裏人語棹聲中
餘卉纔分影新蒲自作叢前灣更幽絕雖淺去猶通

汎溪

許渾

疑與武陵通青谿碧嶂中水寒深見石松晚靜聞風
遯迹驅鷄吏冥心失馬翁纔應畢婚嫁還此息微躬

遊溪

元稹

野水煙鶴唳楚天雲雨空翫舟清景晚垂釣綠蒲中

落花飄旅衣歸流澹輕風緣源不可極遠樹但青蔥
虎丘寺西小溪閒汎三絕 皮日休

鼓子花明白石岸桃枝竹覆翠嵐溪分明似對天台
洞應厭頑仙不肯迷

絕壑祗憐白羽傲窮谿唯覺錦鱗癡更深尚有通樵
處或是仙人未可知

高下不驚紅翡翠淺深還礙白薔薇船頭繫個松根
上欲待逢仙不擬歸

奉和小溪閒汎次韻 陸龜蒙

樹號相思枝拂地鳥語提壺聲滿溪雲涯一里千萬

曲直是漁翁行也迷

荒柳臥波渾似困宿雲遮塢未全癡雲情柳意蕭蕭
會若問諸餘總不知

每逢孤嶼一倚檝便欲狂歌同採薇任是煙蘿中待
月不妨欹枕扣舷歸

溪漲 杜甫

當時浣花橋溪水纔尺餘白石明可把水中有行車

秋夏忽汎溢豈唯入吾廬蛟龍亦狼狽况是鱉與魚

茲晨已半落歸路跬步疎馬嘶未敢動前有深填淤

青青屋東麻散亂牀上書不意遠山雨夜來復何如

我遊都市間晚憇必村墟乃知久行客終日思其居

宿溪翁

白居易

衆心愛金玉衆口貪酒肉何此溪上翁飲瓢亦自足
溪南刈薪草溪北修墻屋歲種一頃田春驅兩黃犢
于中甚安適此外無營欲溪畔偶榭逢庵中遂同宿
辭翁向朝市問我何官祿虛言笑殺翁郎官應列宿

溪叟

僧景雲

溪翁居處靜溪鳥入門飛早起釣魚去夜深乘月歸
露香菰米熟煙煖荇絲肥瀟灑塵埃外扁舟一草衣

贈同谿客

張籍

幽居得相近煙景每寥寥共伐臨谿樹同爲過水橋
自教青鶴舞分採紫芝苗更愛南峰住尋君路恐遙

澗

經慈恩澗

鄭繇

岸與恩同廣波將慈共深涓涓勞日夜長似下流心

南澗

皇甫冉

上路各乘軒高明盡鳴玉寧知澗下人自愛輕波淥

南澗

王建

野桂香滿溪石莎寒覆水愛此南澗頭終日潺湲裏

南澗中題

柳宗元

唐言卷之五
卷之三十五
秋風集南澗獨游亭午時迴風一蕭瑟林影久參差
始至若有得稍深遂忘疲羈禽響幽谷寒藻舞淪漪
去國魂已遊懷人淚空垂孤生易爲感失路少所宜
索寞竟何事徘徊祇自知誰爲後來者當與此心期

西澗卽事示盧陟

韋應物

寢扉臨碧澗晨起澹忘情空林細雨至圓文遍水生
永日無餘事山中伐木聲知子塵喧久暫可散煩纓

滁州西澗

韋應物

獨憐幽草澗邊生上有黃鸝深樹鳴春潮帶雨晚來
急野渡無人舟自橫

幽一作芳生一作行

遊石門澗

白居易

石門無舊徑披榛訪遺跡時逢山水秋清輝如古昔
常聞慧遠輩題詩此巖壁雲覆莓苔封蒼然無處覓
蕭疎野生竹崩剝多年石自從東晉後無復人遊歷
獨有秋澗聲潺湲空旦夕

題龍門堰西澗

白居易

東岸菊叢西岸柳柳陰煙合菊花開一條秋水琉璃
色澗狹纜容小舫迴除却悠悠白少傅何人解入此
中來

龍門下作

白居易

龍門澗下濯塵纓擬作閒人過此生筋力不將諸處
用登山臨水詠詩行

商山麻澗

杜牧

雲光嵐彩四面合柔柔垂柳十餘家雉飛鹿過芳草
遠牛巷鷄埒春日斜秀眉老父對罇酒舊袖女兒簪
野花征車自念塵土計惆悵溪邊書細沙

石淙

石淙十首

孟郊

巖谷不自勝水木幽竒多朔風入空曲涇流無大波
迢遞逗難盡參差勢相羅雪霜有時洗塵土無由和

潔冷誠未厭晚步將如何

二

出曲水未斷入山深更重泠泠若僊語皎皎多異容
萬響不相雜四時皆自濃日月互分照雲霞各生峰
久迷向方理逮茲聳前蹤

三

荒策每恣遠顛步難自迴已抱苔蘚疾一作疲尚凌潺
湲隈驛驥苦銜勒籠禽恨摧頽實力苟未足浮誇信
悠哉顧惟非時用靜言還自哈

四

朔水刀劍利秋石瓊瑤鮮魚龍氣不腥潭洞狀更妍
 磴雪入呀谷掬星灑遙天聲忙一作迫不及韻勢疾多
 斷連輸去雖有恨躁氣一作翻一何顛蜿蜒相纏掣犖
 确亦迴旋黑草濯鐵髮白苔浮水錢具一作其此生云
 遙非德不可甄何況被群士制之空以權始知靜剛
 猛文教從來先

五

空谷聳視聽幽湍澤心靈疾流脫鱗甲疊岸衝風霆
 丹巘墮瓌景霽波灼一作閃虛形淙淙丞厚軸稜稜攢
 高冥弱棧跨旋碧危梯倚凝青飄飄鶴骨仙飛動鰲

背庭

一作亭

常聞誇大言下顧皆細萍

六

百尺明鏡流千曲寒星飛為君洗故物有色如新衣
 不飲泥土污但飲雪霜肌石稜玉纖纖草色瓊霏霏
 谷磴有餘力溪春亦多機從來一智萌能使眾利歸
 因之山水中喧然論是非

七

入深得奇趣昇險為良濟搜勝有聞見逃俗無蹤蹊
 穴流恣迴轉竅景忘東西顛獸鮮猜懼羅人巧置鼎
 幽馳異處所忍慮多端倪虛獲我何飽實歸彼非迷

斯文浪云潔此旨誰得齊

八

屑珠瀉潺湲裂玉何威瓌若調千瑟絃未果一曲諧
古駭毛髮悚險驚視聽垂樹老皆勁骨風趨綠欹崖
地遠有餘遺一作美我遊採棄奇一作懷乘時幸勤鑒前
恨多幽霾弱力謝剛健蹇策貴安排始知隨事靜何
必當夕齋

九

昔浮南渡颯今攀朔山景物色多瘦削吟笑還孤永
日日凍有稜雪霜空無影玉噴不生冰瑤渦旋成井

潛角時聳光隱鱗乍漂回再吟獲新勝返步失前省
愜懷雖已多惕慮未能整頽陽落何處昇魄銜疎嶺

十

聖朝搜巖谷此地多遺玩怠墮成遠遊頽恣靈一作
虛觀勁颯刷幽視怒水懾餘湍一作曾是結芳一作
誠遠茲勉流倦冰條聳危慮霜翠瑩遐盼物誘信多
端荒尋諒難遍去矣朔之隅脩然楚之甸

唐詩類苑卷第三十六

明雲間張之象玄超甫纂輯

雲間徐光啓子先甫編次

雲間王徹叔朗甫補訂

梁谿曹仁孫伯安甫校正

水部

池

詠池

李嶠

綵棹浮太液清觴醉習家詩情對明月雲曲拂流霞
煙散龍形淨波含鳳影斜安仁動秋興魚鳥思空賒

冬日臨昆明池

貞觀四年

太宗

昆明池在上林苑周回十里漢武帝元狩四年欲
伐昆明穿此池以習水戰中有豫章臺刻石爲鯨
魚每至雷雨常鳴吼鬣尾皆動旁有二石人立牽
牛織女於池之東西以象天河武帝初穿池得黑
土帝問東方朔朔曰西域胡人知乃問胡人胡人
曰劫燒之餘灰也

石鯨分玉溜劫燼隱平沙柳影冰無葉梅心凍有花
寒朝凝野霧霜天散夕霞懽情猶未極落景遽西斜
昆明池晏坐王兵部珣見示以三韻因而有

荅

蘇頌

畫舸疾如飛遙遙泛夕暉石鯨吹浪隱玉女步塵歸
獨有銜恩處明珠在釣磯

和許侍郎遊昆明池

李百藥

神池望北極滄波接遠天儀星似河漢落景類虞泉
年深平館宇道泰偃戈船差池下鳧鴈掩映生雲煙
浪花開已合風文直且連稅馬金堤外橫舟石岸前
羽觴傾綠蟻飛日落紅鮮積水浮深智明珠耀雅篇
大鯨方遠擊沈灰獨未然知君嘯儔侶短翮徒聯翩

昆明池侍宴應制

沈佺期

武帝伐昆明穿池習五兵水同河漢在館有豫章名
我后光天德垂衣文教成黷兵非帝念勞物豈皇情
春仗過鯨沼雲旗出鳳城靈魚銜寶躍仙女廢機迎
柳拂旌門暗蘭依帳殿生還如流水曲日晚棹歌聲
恩敕尚書省寮宴昆明池應制同用堯字

張嘉貞

靈沼初開漢神池舊浴堯昔人徒習武明代此聞韶
地脉山川勝天恩雨露饒時光牽利舸春淑覆柔條
芳醞醒千日華牋落九霄幸承歡賚重不覺醉歸遙
恩敕尚書省寮宴昆明池應制同用堯字

蘇頌

露渥灑雲霽天官次斗杓昆明四十里空水極晴朝
鴈似銜紅葉鯨疑噴海潮翠山來徹底白日去迴標
泳廣漁槎溢浮深妓舫搖飽恩皆醉止合舞共歌堯

奉和晦日幸昆明池應制 宋之問

景龍三年正月晦日中宗皇帝幸昆明池賦詩群
臣應制百餘篇帳殿前結綵樓命昭容選一首爲
新翻御製曲從臣悉集其下須臾紙落如飛各認
其名而懷之旣退唯沈宋二詩不下又移時一紙
飛墜競取而觀乃沈詩也及聞其評曰二詩工力

悉敵沈詩落句云微臣彫朽質羞覩豫章材蓋詞
氣已竭宋詩云不愁明月盡自有夜珠來猶陟健
舉沈乃服不敢復爭

春豫靈池會滄波帳殿開舟凌石鯨度槎拂斗牛迴
節晦莫全落春遲柳暗催象溟看浴景燒劫辨沈灰
鎬飲周文樂汾歌漢武才不愁明月盡自有夜珠來

奉和晦日幸昆明池應制 沈佺期

法駕乘春轉神池象漢回雙星遺漢石孤月隱殘灰
戰鷁逢時去恩魚望幸來山花緹騎遶堤柳幔城開
思逸橫汾唱歌荒宴鎬杯微臣彫朽質羞覩豫章材

奉和晦日幸昆明池應制 蘇頲

炎曆事邊陲昆明始鑿池豫遊光後聖征戰罷前規
霽色清珍宇年芳入錦陂御杯蘭薦葉僊仗柳交枝
二石分河瀉雙珠代月移微臣比翔泳恩廣自無涯

奉和晦日幸昆明池應制 李義

玉路尋春賞金堤重晦遊川通黑水漫地脉紫泉流
晃朗扶桑出綿聯樹杞周鳥疑埋海處人似隔河秋
劫盡灰猶識年移石故留汀洲歸棹晚簫鼓雜汾謳

晦日同志昆明池汎舟

故人同汎處遠色望中明靜見砂痕露微思月鬼生

唐詩類苑 卷之二十一
周迴餘雪在浩渺暮雲平戲鳥隨蘭棹空波蕩石鯨
劫灰難問理島樹偶知名自省曾遊賞無如此日情

晦日同志昆明池汎舟

靈沼疑河漢蕭條見斗牛煙生知岸近水淨覺天秋
落月低前樹清輝滿去舟興因孤嶼起心爲白蘋留
曉吹兼漁唱閒雲伴客愁龍津如可上長嘯且乘流
遊長寧公主流杯池二十五首

上官昭容

長寧公主韋庶人所生下嫁楊慎交皇帝制曰門
下特進行右散騎常侍駙馬都尉觀國公楊慎交

分榮戚里藉寵公門恭肅著于立身協勤効于從
政鳳凰樓上宛符琴瑟之歡烏鵲橋前載協松蘿
之契宜覃茅土式廣山河因造第於東都府財幾
竭又取西京高力士第左金吾衛廢營合爲宅作
三重樓築山浚池帝及后數臨幸今昭容賦詩群
臣屬和

逐仙賞展幽情踰崑閬訪蓬瀛

二

遊魯館陟秦臺汗山壁愧瓊瓌

三

唐詩類苑 卷之三十六 五
檀欒竹影颺颺松聲不煩歌吹自足怡情

四

仰循茅宇俯盼喬枝煙霞問訊風月相知

五

枝條鬱鬱文質彬彬山林作伴松桂爲鄰

六

清波洶湧碧樹冥蒙莫怪留步因攀桂叢

七

莫論圓嶠休說方壺何如魯館卽是仙都

八

攀藤招逸客偃桂叶幽情水中看樹影風裏聽松聲

九

攜琴待叔夜負局訪安期不應留石壁爲記賞山時

十

泉石多仙趣巖壑寫竒形欲知堪悅耳惟聽水泠泠

十一

巖壑恣登臨瑩目復怡心風篁類長笛流水當鳴琴

十二

懶步天台路惟登地肺山幽巖仙桂滿今日恣情攀

十三

暫遊仁智所蕭然松桂情寄言棲遁客勿復訪蓬瀛
十四

瀑溜晴疑雨叢篁晝似昏山中真可玩暫請報王孫
十五

傍池聊試筆依石旋題詩預彈山水調終擬從鍾期
十六

橫鋪豹皮褥側戴鹿胎巾借問何為者山中有逸人
十七

沁水田園先自多齊梁樓觀更無過倩語張騫莫辛
苦人今從此識天河

十八

參差碧岫聳蓮花潺湲綠水瑩金沙何須遠訪三山
路人今已到九仙家

十九

憑高瞰險足怡心菌閣桃源不暇尋餘雪依林成玉
樹殘雲點岫即瑤琴

二十

玉環騰遠創金埒荷殊榮弗玩珠璣飾仍留仁智情
鑿山便作室憑樹即為楹工輸與班爾從此遂韜聲

二十一

唐詩類苑 卷之三十六
登山一長望正遇九春初結駟填街術閭閻滿邑居
鬪雪梅先吐驚風柳未舒直愁斜日暮不畏酒樽虛
二十二

霽曉氣清和披襟賞薜蘿玳瑁凝春色琉璃漾水波
跂石聊長嘯攀松乍短歌除非物外者誰就此經過
二十三

暫爾遊山第淹留惜未歸水窻明月滿澗戶白雲飛
書引藤爲架人將薜作衣此真攀玩所臨睨賞光輝
二十四

放曠出煙雲蕭條事不群激流清意府隱几避囂氛

石畫裝苔色風梭織水文山室何爲貴唯餘蘭桂薰
二十五

策杖臨霞岫危步下霜蹊志逐深山靜途隨曲澗迷
漸覺心神逸俄看雲霧低莫怪人題樹祗爲賞幽棲
奉和中宗皇帝幸興慶池戲競渡應制

李適

拂露金輿丹旆轉凌晨黼帳碧池開南山倒影從雲
落北澗搖光寫浪迴急舸爭標排荇度輕帆截浦觸
荷來橫汾燕鎬歡無極歌舞年年聖壽杯

奉和中宗皇帝幸興慶池戲競渡應制

徐彦伯

夾道傳呼翊翠虬天迴地轉御芳洲青潭曉靄籠仙
躡紅嶼晴花隔綵旒香溢金環盈廣坐聲傳妓舸匝
中流群分相慶嘉魚樂共晒橫汾歌吹秋

興慶池侍宴應制

蘇頌

降鶴池前迴步輦棲鸞樹杪出行宮山光積翠遙疑
逼水態含清近若空直視天河垂象外俯窺京室盡
圖中皇情未使恩波極日暮樓船更起風

興慶池侍宴應制

劉憲

蒼龍闕下天泉池軒駕來遊簫管吹綠堤夏篠榮不

散冒水新荷卷復披帳殿疑從畫裏出樓船直在鏡
中移自然東海神仙處何用西崑轍迹疲

興慶池侍宴應制

李乂

神池汎濫水盈科仙躡紆徐步輦過縱棹洄沿萍溜
合開軒眺賞麥風和潭魚在藻欣游泳谷鳥含櫻入
賦歌寄謝乘槎濱海客詎須來此問天河

興慶池侍宴應制

沈佺期

碧水澄潭映遠空紫雲香駕御微風漢家宮闕疑天
上秦地山川似鏡中向浦迴舟萍已綠分林蔽殿槿
初紅古來徒羨橫汾賞今日宸遊聖藻雄

興慶池侍宴應制

武平一

鑾輿羽駕直城隈
帳殿金門此地開
皎潔靈潭圖日月
參差畫舸結樓臺
波搖岸影隨橈轉
風送荷香入酒來
願奉聖情歡不極
長遊雲漢幾昭回

興慶池侍宴應制

蘇瓌

金闕平明宿霧收
瑤池式燕俯清流
瑞鳳飛來隨帝輦
祥魚出戲躍王舟
帷齊綠樹當筵密
蓋轉細荷接岸浮
如臨竊比微臣懼
若濟叨陪聖主遊

興慶池侍宴應制

馬懷素

積水逶迤繞貝城
含虛皎鏡有餘清
圖雲曲榭連緹

幕映日中塘間綵旌
賞洽猶聞簫管沸
歡留更睹木蘭輕
無勞海上尋仙客
卽有蓬萊在帝京

興慶池侍宴應制

韋元旦

滄池漭沆帝城邊
殊勝昆明鑿漢年
夾岸旌旂疎輦道
中流簫鼓振樓船
雲峰四起迎宸幄
水樹千重入御筵
宴樂已深魚藻詠
承恩更欲奏甘泉

興慶池侍宴應制

張說

靈池月滿直城隈
黼帳天臨御路開
東沼初陽疑吐
出南山曉翠若浮來
魚龍百戲分容與
鳧鷖雙舟較
沂洄願似金堤青
青草長承瑤水白
雲杯

三月三日詔宴定昆池官莊賦得筵字

張說

鳳凰樓下對天泉鸚鵡洲中匝管絃舊識平陽佳麗地今逢上巳盛明年舟將水動千尋日幕共林橫兩岸煙不降玉人觀襖飲誰令醉舞拂賓筵

奉和聖製龍池篇

張九齡

天啓神龍生碧泉泉水靈源浸迤延飛龍已向珠潭出積水仍將銀漢連岸傍花柳看勝畫浦上樓臺問是仙我有元符從此得方爲萬歲壽圖川

奉和聖製龍池篇

姚崇

恭聞帝里生靈祉應報明君鼎業新旣叶翠泉光寶命還符白水出真人當時舜海潛龍躍此日堯池帶馬巡獨有前河一小鴈叨承舊惠入天津

奉和聖製龍池篇

蔡孚

帝宅王家大道邊人馬潛龍湧聖泉昔日昔時經此地看來看去漸成川歌臺舞榭宜正月柳岸梅洲勝往年莫疑波上春雲少祗爲龍飛直上天

奉和聖製龍池篇

沈佺期

龍池躍龍龍已飛龍德先天天不違池開天漢分黃道龍向天門入紫微邸第樓臺多氣色君王鳧鴈有

光輝爲報寰中百川水來朝此地莫東歸

奉和聖製龍池篇

盧懷慎

代邸東南龍或躍清泉碧浪遠浮天樓臺影就波中
出日月光疑鏡裏懸鴈沼回流成舜海龜書靈祉應
堯年大川旣濟慙爲楫報德空思奉細涓

奉和聖製龍池篇

姜皎

龍池初此出龍山常經此地謁龍顏日日芙蓉生夏
水年年楊柳變春灣堯壇寶匣餘煙霧舜海漁舟尚
往還願以飄颻五色影從來從去九天間

奉和聖製龍池篇

崔日用

龍興白水漢興符聖主時乘運斗樞岸上芊茸五花
樹波中的皦千金珠操環昔聞迎夏啓發匣先來瑞
有虞風色雲光隨隱見赤雲神化象江湖

奉和聖製龍池篇

蘇頲

西京鳳邸躍龍泉佳氣休光鍾在天軒后霧圖今已
得秦皇水劍昔當傳恩魚不似昆明釣瑞鶴常如太
液仙願侍巡遊同舊里更聞簫鼓濟樓船

奉和聖製龍池篇

李乂

星分邑里固人居水洊源流萬頃餘魏國君王秤象
處晉家蕃邸化龍初青蒲似騁遊梁鳥綠藻疑游宴

唐詩類苑 卷之三十一
鎬魚自有神靈滋液地年年雲物史官書

奉和聖製龍池篇

裴 璿

乾坤啓聖吐龍泉泉水年年勝一年始看魚躍方成
海卽覩龍飛利在天洲渚遙將銀漢接樓臺直與紫
微連休氣榮光恒不散懸知此地是神仙

奉和聖製龍池篇

姜 晞

靈沼縈迴邸第前浴日涵春寫曙天始見龍臺昇鳳
闕應知霄漢起神泉石匱渚傍還啓聖桃李初生更
有仙欲化帝圖從此受正同河變一千年

龍池

李商隱

龍池賜酒敞雲屏羯鼓聲高衆樂停夜半宴歸鐘漏
永薛王沈醉壽王醒

太子池二首

温庭筠

梨花雪壓枝鶯轉柳如絲懶逐妝成曉春融夢覺遲
鬢輕全作影顰淺未成眉莫信張公子窻間斷暗期

二

花紅蘭紫莖愁草雨初晴柳占三春色鶯偷百鳥聲
日長嫌輦重風暖覺衣輕薄暮香塵起長揚落照明

天池

杜 甫

天池馬不到嵐壁鳥纔通百頃青雲秒層波白石中

唐言類考 卷之三十一
三十一
鬱紆勝秀氣蕭瑟浸寒空直對巫山出兼疑夏禹功
魚龍開闢有菱茨古今同聞道奔雷黑初看浴日紅
飄零神女雨斷續楚王風欲問支機石如臨獻寶宮
九秋驚鴈序萬里狎漁翁更是無人處誅茅任薄躬
憶春日太液池東亭候對 李 紳
宮鶯曉報瑞煙開三島靈禽拂水迴橋轉綵虹當綺
殿檻浮花鷁近蓬萊草承步輦王孫長桃艷仙顏阿
母栽簪筆此時方侍從却思金馬笑鄒枚

太液池歌

温庭筠

腥鮮龍氣連清防花風漾漾吹細光疊瀾不定照天

井倒影蕩搖晴翠長平碧淺春生綠塘雲容雨態連
青蒼夜深銀漢通栢梁二十八宿朝玉堂

晚秋陪嚴鄭公摩訶池汎舟

杜 甫

湍駛風醒酒船行霧起隄高城秋自落雜樹晚相迷
坐觸鴛鴦起巢傾翡翠低莫須驚白鷺爲伴宿清溪

偶宴西蜀摩訶池

暢 當

珍木鬱清池風荷左右披淺觴寧及醉慢舸不知移
蔭竹簟光冷照流簪影歆胡爲獨羈者雪涕向流漪

盆池

杜 牧

鑿破蒼苔地偷他一片天白雲生鏡裏明月落階前

盆池

張蠙

圓內陶化功外絕衆流通選處離松影穿時減藥叢
別疑天在地長對月當空每使登門客煙波入夢中

盆池五首

韓愈

老翁真箇是童兒汲水埋盆作小池一夜青蛙鳴到
曉恰如方口釣魚時

莫道盆池作不成藕梢初種已齊生從今有雨君須
記來聽蕭蕭打葉聲

瓦沼晨朝水自清小蟲無數不知名忽然分散無蹤

影惟有魚兒作隊行

泥盆淺小詎成池夜半青蛙聽得知一聽暗來將伴
侶不須鳴喚鬪雄雌

池光天影共青青拍岸纔添水數瓶且待夜深明月
去試看涵泳幾多星

同韓侍郎遊鄭家池吟詩小飲

白居易

野艇容三人晚池流浼浼悠然倚棹坐水勢如江海
宿雨洗沙塵晴風蕩煙靄殘陽上竹樹枝葉生光彩
我本偶然來景物如相待白鷗驚不起綠芡行堪採

齒髮雖已衰性靈未云改逢時遇杯酒尚有心情在
題灞池二首 王昌齡

腰鎌欲何之東園刈秋韭世事不復論悲歌和樵叟

二

開門望長川薄暮見漁者借問白頭翁垂綸幾年也

汎觴池

薛能

通咽遠華罇汎觴名自君靜看籌見影輕動酒生紋

細滴隨盃落來聲就浦分便應半醉後清冷漱寒雲

晚題東林寺雙池

白居易

向晚雙池好初晴百物新裊枝翻翠羽濺水躍紅鱗

萍汎同遊子蓮開當麗人臨流一惆悵還憶曲江春

和令公新開龍泉晉水二池

白居易

舊有潢汙泊今為白水塘笙歌聞四面樓閣在中央

春變煙波色晴添樹木光龍泉信為美莫忘午橋莊

旦攜謝山人至愚池

柳宗元

新沐換輕幘曉池風霧清自諧塵外意况與幽人行

霞散眾山迴天高數鴈鳴機心付當路聊適義皇情

集賢池荅侍中問

白居易

主人晚入皇城宿問客徘徊何所須池月幸閑無用

唐詩類苑 卷之三十六
處今宵能借客遊無

澠池

汪遵

西秦北趙各稱高池上張筵列我曹何事君王親擊
缶相如有劍可吹毛

瑤池

李商隱

瑤池阿母綺窻開黃竹歌聲動地哀八駿日行三萬
里穆王何事不重來

凝碧池侍宴看競渡應制

李懷遠

上苑清鑿路高居重豫遊前對芙蓉沼傍臨杜若洲
地如玄扈望波似洞庭秋列筵飛翠竿分曹戲鷁舟

湍高棹影沒岸近榜歌道舞曲依鸞殿簫聲下鳳樓
忽逢天上樂疑逐海槎流

陪竇侍御汎靈雲池

高適

白露時光降清川思不窮江湖仍塞上舟楫在軍中
舞換臨津樹歌饒向晚風夕陽連積水邊色滿秋空
乘興宜投轄邀歡莫避驄誰憐持弱羽猶欲伴鷓鴻

省試奉詔漲曲江池

黃滔

池脉寒來淺恩波住後新引將諸派水別貯大都春
幽咽疏通處清冷迸入辰漸平連杏岸旋濶映樓津
沙沒迷行徑洲寬恣躍鱗願當舟楫便一附濟川人

唐言類苑 卷之三十六
靈雲池送從弟

王維

見人部兄弟

乾符丙申歲春奉試漲曲江池

鄭谷

王澤尚通津恩波此日新深疑一夜雨宛似五湖春
汎灩翹振鷺澄清躍紫鱗翠低孤嶼柳香失半汀蘋
鳳輦尋佳境龍舟命近臣桂華如入手願作從游人

高陽池送朱二

孟浩然

當昔襄陽雄盛時山公常醉習家池池邊釣女日相
隨妝成照影近來窺紅波澹澹芙蓉發綠岸彬彬楊

柳垂一朝物變人亦非四面荒涼人住稀意氣豪華
何處在空餘草露濕征衣此地朝來餞行者翻向此
中牧征馬征馬分飛漸日斜見此空爲人所嗟殷勤
爲訪桃源路予亦歸來松子家

履道池上作

白居易

家池動作經旬別松竹禽魚好在無暗樹小巢藏巧
婦草荒新葉長慈姑不因車馬時時到豈覺林園日
日蕪猶喜春深公事少每來花下得踟躕

和沈參軍招友生觀芙蓉池

溫庭筠

唐詩類苑 卷之三十一
桂棟坐清曉，瑤瑟商鳳絲。况聞楚澤杳，適與秋風期。
遂從棹萍客，靜笑煙草湄。倒影迴愁蕩，愁紅媚連漪。
湘莖久鮮涇，宿雨增離披。而我江海意，楚遊動夢思。
北渚水雲葉，南塘煙霧枝。豈亡臺榭芳，獨與鷗鳥知。
珠墜魚迸淺，影多鳧汎遲。落英不可攀，返照昏澄陂。
杭州北郭戴氏荷池送侯愉

崔國輔

秋近萬物肅，况當臨水時。折花贈歸客，離緒斷荷絲。
誰爲江國永，故人感在茲。道存過北郭，情極望東菑。
喬木故園意，鳴蟬窮巷悲。扁舟竟何待，中路每遲遲。

龍昌寺荷池

白居易

冷碧新秋水，殘紅半破蓮。從來寥落意，不似此池邊。
秋晚雲陽驛西亭蓮池 許渾

心憶蓮池秉燭遊，葉殘花敗尚維舟。煙開翠扇清風
曉，水汎紅衣白露秋。神女暫來雲易散，仙娥初去月
難留。空懷遠道無持贈，醉倚欄干盡日愁。

相州山池

張說

嘗懷謝公詠，山水陶嘉月。及此年事衰，徒看衆花發。
觀魚樂何在，聽鳥情都歇。星漢流不停，蓬萊去難越。
鄴中秋麥秀，淇上春雲沒。日見塵物空，如何靜心闕。

宴鄭參卿山池

李白

爾恐碧草晚我畏朱顏移愁看楊花飛置酒正相宜
歌聲送落日舞影迴清池今夕不盡杯留歡更邀詩

唐都尉山池

崔湜

曲渚颺輕舟前溪釣晚流鴈翻蒲葉起魚撥荇花遊
金子懸湘柚珠房拆海榴幽尋惜未已清月半西樓
同族姪評事黯遊昌禪師山池二首

李白

遠公愛康樂爲我開禪關蕭然松石下何異清涼山
花將色不染水與心俱閒一坐度千劫觀空天地間

二

客來花雨際秋水落金池片石寒青錦疎楊挂綠絲
高僧拂玉柄童子獻雙梨惜去愛佳景煙蘿欲暝時

題沈東美員外山池

綦母潛

仙郎偏好道鑿沼象瀛洲魚樂隨情性舟行任去留
秦人辨鷄犬堯日識巢由歸客衡門外仍憐返景幽

過崔駙馬山池

王維

畫樓吹笛妓金碗酒家胡錦石稱貞女青松學大夫
脫貂貫桂醕射鴈與山厨聞道高陽會愚公公正愚
從岐王夜讌衛家山池應教

座客香貂滿宮娃騎幔張澗花輕粉色山月少燈光
積翠紗窗暗飛泉繡戶涼還將歌舞出歸路莫愁長

王維

姚開府山池

孟浩然

主人新邸第相國舊池臺館是招賢闢樓因教舞開
軒車人已散簫管鳳初來今日龍山下誰知文舉才

蕭文學山池宴

獨孤及

檀欒千畝綠知是辟疆園遠岫當庭戶諸花覆水源
主人邀盡醉林鳥助狂言莫問愁多少今皆付酒罇

蘇著作山池

賈彥璋

水樹子雲家蓬瀛宛不賒芥浮舟是葉蓮發岫為花
酌蟻開春甕觀魚憑海槎遊蘇多石友題贈滿瑤華

安德山池宴集

李百藥

朝宰論思暇高宴臨方塘雲飛鳳臺管風動令君香
細草開金埒流霞泛羽觴虹橋分水態鏡石引菱光
上才同振藻小伎謬連章懷音自蘭室徐步及山莊

安德山池宴集

劉洎

平陽擅歌舞金谷盛招攜何如兼往烈命賞叶幽棲
已均朝野致還欣物我齊春晚花方落蘭深逕漸迷
蒲新節尚短荷小蓋猶低無勞拂長袖直待夜鳥啼

安德山池宴集

岑文本

甲第多清賞芳辰命羽卮書帷通竹逕琴臺枕槿籬
池疑夜壑徙山似鬱洲移雕楹網蘿薜激瀨合墳荒
鳥戲翻新葉魚躍動清漪自得淹留趣寧勞攀桂枝

安德山池宴集

楊續

狹斜通鳳闕上路抵青樓簪綬啓賓館軒蓋臨御溝
西城多妙舞主第出名謳列峰疑宿霧疏壑擬藏舟
花蝶亂風影蘋藻含春流酒闌高宴畢自反山之幽

安德山池宴集

上官儀

路上抵平津後堂羅薦陳締交開狎賞麗則展芳辰

密樹風煙積迴堂荷芰新雨霽虹橋晚花落鳳臺春
翠釵低舞席文杏散歌塵方惜流觴滿夕鳥已城闈

安德山池宴集

許敬宗

戚里歡娛地園林矚望新山亭帶芳杜歌吹叶陽春
臺榭疑巫峽荷蕖似洛濱風花縈少女虹梁聚美人
宴遊窮至樂譚笑畢良辰獨歎高陽晚歸路不知津

安德山池宴集

褚遂良

伏歷丹霞外遮園煥景舒行雲汎層阜蔽月下清渠
亭中奏趙瑟席上舞燕裾花落春鶯晚風光夏葉初
良朋比蘭蕙雕藻邁瓊琚獨有狂歌客來承歡宴餘

唐詩類苑 卷之三十六
奉和宴小山池賦得谿字應制

武三思

年光開碧沼雲色斂青谿凍解魚方戲風暄鳥欲啼
巖泉飛野鶴石鏡舞山鷄柳發龍鱗上松新麈尾齊
九韶從此驗三月定應迷

城南山池

張九齡

城南隅山池春仲田袁二公盛稱其美夏首獲賞
果會夙言故有此詠

憶昨聞佳境駕言尋昔蹊非唯初物變亦與舊遊睽
幽渚爲君說清晨卽我攜逢深獨睥睨歷險共攀躋

林笋包青籜津楊委綠萋荷香初出浦草色復緣堤
樂處將鷗狎譚端用馬齊且言臨海郡兼話武陵溪
異壤風煙絕空山巖徑迷如何際朝野從此待金閨
題少府監李丞山池 李頎

能向府亭內置茲山與林他人驕驕馬而我薜蘿心
雨止禁門肅鶯啼宮柳深長廊闕軍器積水背城陰
窻外王孫草牀頭中散琴清風多仰慕吾亦爾知音
奉陪郭常侍宴滄川山池 錢起

掖垣攜愛客勝地賞年光向竹過賓館尋山到妓堂
歌聲掩金谷舞態出平陽地滿簪裾影花添蘭麝香

唐詩類苑 卷之三十六
鶯啼春未老酒冷日猶長安石風流事須歸問一作騎
省郎

閒題家池寄王屋張道士 白居易

有石白磷磷有水清潺潺有叟頭似雪婆娑乎其間
進不趨要路退不入深山深山太濶落要路多險難
不如家池上樂逸無憂患有食適吾口有酒醲吾顏
恍惚遊醉鄉希夷造玄關五千言下悟十二年來閒
富者我不顧貴者我不攀唯有天壇子時來一往還
秋夜與劉碭山汎宴喜亭池

李白

明宰試舟楫張燈宴華池文招梁苑客歌動郢中兒
月色望不盡空天交相宜令人欲泛海只待長風吹

滁州園池宴元氏親屬 韋應物

日暮遊清池疎林羅一作籠高天餘綠飄霜露夕氣變

風煙水門架危閣竹亭列廣筵一展私姻禮屢歎芳
罇前感往在茲會傷離屬頽年明晨復云去且願此
留連

題韋家泉池 白居易

泉落青山出白雲縈村遶郭幾家分自從引作池中
水深淺方圓一任君

和韓侍郎題楊舍人林池見寄

白居易

渠水暗流春凍解風吹日炙不成疑鳳池冷暖君諳
在二月因何更有冰

朱坡故少保杜公池亭

許渾

杜陵池榭綺城東孤島迴汀路不窮高岫乍疑三峽
近遠波初似五湖通楸梧葉暗瀟瀟雨菱荇花香澹
澹風還有昔時巢燕在飛來飛去盡堂中

題壽安王主簿池館

蘇頲

洛邑通馳道韓郊在屬城館將花雨映潭與竹聲清

賢俊鸞棲棘賓遊馬佩衡願言隨狎鳥從此濯吾纓

宴遊池館

劉兼

綺筵金碧照芳菲酒滿瑤簪水滿池去歲南岐離郡
日今春東蜀看花時儉蓮發臉當籌著緒柳生腰按
柘枝座客半酣言笑狎孔融懷抱正怡怡

官池上

僧無可

迴疏城闕內寒瀉出雲波岸廣山魚到汀閒海鷺過
汎溝侵道急流葉入宮多移舸浮中沚清宵徹曉河

綿州官池贈別

盧照鄰

輶軒遵上國仙氣下靈關樽酒妨無地聯綵喜暫攀

唐詩類苑 卷之三十六
離言欲贈策高辯正連環野逕游雲斷荒池春草斑
殘花落古樹度鳥入澄灣欲叙他鄉別幽谷有綿蠻

官池秋夕

羅隱

池邊月影閑婆娑池上醉來成短歌芙蓉抵死怨珠
露蟋蟀苦口嫌金波往事向人言不得舊遊臨老恨
空多松膠作酒蘭爲棹十載煙塵柰爾何

泛春池

白居易

白蘋湘渚曲綠篠剡溪口各在天一涯信美非吾有
何如此庭內水竹交左右霜竹百千竿煙波六七畝
泓澄動堦砌澹泞映戶牖虵皮細有文鏡面清無垢

主人過橋來雙童挾一叟恐污清泠波塵纓先抖擻
波上一葉舟舟中一樽酒酒開舟不繫去去隨所偶
或繞蒲浦前或泊桃島後未撥落杯花低衝拂面柳
半酣迷所在倚榜兀迴首不知此何處復是人寰否
誰知始疏鑿幾主相傳授楊家去云遠田氏將非久
天與愛水人終焉落吾手

春池上戲贈李郎中

白居易

滿池春水何人愛唯我迴看指似君直似揆藍新汁
色與君南宅染羅裙

秋池二首

白居易

身閒無所為心閒無所思况當故園夜復此新秋池
岸闌鳥棲後橋明月出時菱風香散漫桂露光參差
靜境多獨得幽懷竟誰知悠然心中語自問來何遲

二

朝衣薄且健晚簟清仍滑社近燕影稀雨餘蟬聲歇
閒中得詩境此境幽難說露荷珠自傾風竹玉相戛
誰能一同宿共玩新秋月暑退早涼歸池邊好時節

秋池二首

白居易

前池秋始半卉物多摧壞欲暮槿先萎未霜荷已敗
默然有所感可以從茲誠本不種松筠早凋何足怪

二

鑿池貯秋水中蘋與芰天旱水暗消塌然委空地
有似汎汎者附離權與貴一旦恩勢移相隨共憔悴

秋池

白居易

洗浪清風透水霜水邊閒坐一繩牀眼塵心垢見皆
盡不是秋池是道場

夜池

元稹

荷葉團圓莖削削綠萍面上紅衣落滿池明月思啼
蟹高屋無人風張去聲幕

張常侍池涼夜閒宴

贈諸公

白居易

唐詩類苑 卷之三十一
竹橋新月上水岸涼風至對月五六人管絃三兩事
留連池上酌欵曲城外意或笑或謳吟誰知此閒味
迴看市朝客矻矻趨名利朝忙少遊宴夕困多眠睡
清涼屬吾徒相逢勿辭醉

官舍內新開小池

白居易

簾下開小池盈盈水方積中底鋪白沙四隅甃青石
勿言不深廣但取幽人適汎灑微雨朝泓澄明月夕
豈無大江水波浪連天白未若牀席前方丈深盈尺
清淺何狎弄昏煩聊漱滌最愛曉暝時一片秋天碧

小池二首

白居易

晝倦前齋熱晚愛小池清映林餘景沒近水微涼生
坐把蒲葵扇閒吟三兩聲
有意不在大湛湛方丈餘荷側瀉清露萍開見遊魚
每一臨此坐憶歸清溪居

滕校書使院小池

賈島

小池誰見鑿時初走水南來十里餘樓上日斜吹暮
角院中人出鑊游魚

題蕭丞小池

錢起

鶯鳴蕙草綠朝與人情期林沼忘言處鴛鴻養翮時
春泉滋藥暖晴日度花遲此會無辭醉良辰難再追

仲春宴王補闕城東小池 錢起

王孫興至幽尋好芳草春深景氣和藥院愛隨流水
入山齋喜與白雲過猶嫌巢鶴窺人遠不厭叢花對
客多醉來倚玉無餘事目送歸鴻笑復歌

酬裴相公題興化小池見招長句

白居易

愛為小塘招散客不嫌老監與新詩山公倒載無妨
學范蠡扁舟未要追蓬斷偶飄桃李徑鷗驚誤拂鳳
凰池敢辭課拙訓高韻一勺爭禁萬頃陂

過駱山人野居小池 白居易

茅覆環堵亭泉添方丈沼紅芳照水荷白頸觀魚鳥
拳石苔蒼翠尺波煙杳渺但問有意無勿論池大小
門前車馬路奔走無昏曉名利驅人心賢愚同擾擾
善哉駱處士安置身心了何乃獨多君丘園居者少

于秀才小池 方干

一泓激灩復澄明半日工夫斲小庭占地未過三五
尺浸天唯入兩三星鷓舟草際浮霜葉漁父沙邊駐
小螢纔見規模試方寸知君立意在滄溟

路支使小池 方干

兒童戲穿鑿咫尺見津涯蘚岸和纖草松泉濺淺沙

光含半牀月影入一枝花到此無醒日當時有習家
路支使小池

方干

廣狹偶然非製定猶存方寸象滄溟一泓春水無多
浪數尺晴天幾箇星露滿玉盤當半夜匣開金鏡在
中庭主人垂釣常來此雖把漁竿醉未醒

和范郎中宿直中書曉玩清池贈南省同僚

兩垣遺補

錢起

青瑣留才子春池靜禁林自矜仙島勝宛在掖垣深
引派彤庭裏含虛玉砌陰漲來知聖澤清處見天心
蘭氣飄紅岸文星動碧潯鳳棲長近日虬臥欲爲霖

席寵雖高位流謙乃素襟焚香春一作殘漏盡假寐曉

吟丹地宜清泚一作切朝陽復照臨司言兼逸趣鼓

興接一作屬知音六義驚一作先摛藻三臺響擲金爲憐

風水外落羽此漂沈一作鱗羽

草堂前新開一池養魚種荷日有幽趣

白居易

淙淙三峽水浩浩萬頃陂未知新塘上微風動漣漪
小萍加泛泛初蒲正離離紅鯉二三寸白蓮八九枝
遶水欲成徑護堤方插籬已被山中客呼作白家池

崔十八新池

白居易

唐詩類苑 卷之三十一
愛君新小池池色無人知見底月明夜無波風定時
忽看不似水一泊稀琉璃

觀袁侍郎漲新池

郎一作崔

盧綸

引水香山近穿雲復繞林纔聞籬外響已覺石邊深
滿處侵苔色澄來見柳陰微風月明夜知有五湖心

題許子正處士新池

劉威

坐愛風塵日已西功成得與化成齊巧分孤嶼思何
遠欲似五湖心易迷漸有野禽來試水又憐春草自
侵堤那堪更到芙蓉折晚夕香聯桃李蹊

主人故池

王建

高池高閣上連起荷葉團團蓋秋水主人已遠涼風
生舊客不來芙蓉死

賦得曲池絜寒流

崔立之

閒尋歌岸步因向曲池看透底河澄澈迴流乍屈盤
稍隨高樹古迴與遠天寬月入鏡華轉星臨珠影寒
織鱗時蔽石轉吹或生瀾願假涓微效來濡拙筆端

曲池

李商隱

日下繁香不自持月中流艷與誰期迎憂急鼓疎鐘
斷分隔休燈滅燭時張蓋欲判江灩灩迴頭更望柳
絲絲從來此地黃昏散未信河梁是別離

唐詩類苑 卷之三十六
李卿東池夜宴得池字

獨孤及

政成機不擾心愜宴忘疲去燭延高月傾罍就小池
舞盤迴雪動絃奏躍魚隨自是山公興誰令下士知
陪中書李紆舍人夜泛東池

盧綸

看月復聽琴移舟出樹陰夜村機杼急秋水芰荷深
石靜龜潛上萍開果暗沈何言奉杯酒得見五湖心

興州東池

鄭谷

南連乳郡流澗碧浸晴樓徹底千峰影無風一片秋
垂楊拂蓮葉返照媚漁舟鑑貌還惆悵難遮兩鬢羞

箬峴東池

白居易

箬峴亭東有小池早荷新荇綠參差中宵把火行人
發驚散雙棲白鷺鷥

號州郡齋南池幽興因與閣二侍御道別

岑參

池色淨天碧水涼雨淒淒快風從東南荷葉翻向西
性本愛魚鳥未能返巖谿中歲狗微官遂令心賞睽
及茲佐山郡不異尋幽棲小吏趨竹徑訟庭侵藥畦
胡塵暗河洛二陝振鼓鼙故人佐戎軒逸翮凌雲霓
行軍在函谷兩度聞鶯啼相看紅旗下飲酒白日低

唐言類苑 卷之三十一
聞君欲朝天駟馬臨道嘶仰望浮與沈忽如雲與泥
夜眠驛樓月曉發關城鷄惆悵西郊暮鄉書對君題
至西號官舍南池呈左右省及南宮諸故人

岑參

黜官自西掖待罪臨下陽空積犬馬戀豈思鴛鴦行
素多江湖意偶佐山水鄉滿院池月靜卷簾溪雨涼
軒窗竹翠濕案牘荷花香白鳥上衣桁青苔生筆牀
數公不可見一別盡相忘敢恨青瑣客無情華省郎
早年迷進退晚節悟行藏他日能相訪嵩南舊草堂

南池

杜甫

崢嶸巴閬間所向盡山谷安知有蒼池萬頃浸坤軸
呀然闔城南枕帶巴江腹芰荷入異縣秔稻共比屋
皇天不無意美利戒止足高田失西成此物頗豐熟
清源多衆魚遠岸富喬木獨歎楓香林春時好顏色
南有漢王祠終朝走巫祝歌舞散靈衣荒哉舊風俗
高堂亦明王魂魄猶正直不應空陂上縹緲親酒肉
淫祀自古昔非唯一川瀆干戈浩茫茫地僻傷極目
平生江海興遭亂身局促駐馬問漁舟躊躇慰羈束
喜華陰王少府使到南池宴集

岑參

有客至鈴下自言身性梅仙人掌裏使黃帝鼎邊來
竹影拂碁局荷香隨酒盃池前堪醉臥待月未須回

與任城許主簿遊南池

杜甫

秋水通溝洫城隅進小船晚涼看洗馬森木亂鳴蟬
菱熟經時雨蒲荒八月天晨朝降白露遙憶舊青氊

慈恩精舍南池作

韋應物

清境豈云遠炎氛忽如遺重門布綠陰茵苔滿廣池
石髮散清淺林花動漣漪綠崖摘紫房傍檻集靈龜
浥浥餘露氣馥馥幽襟披積喧忻物曠耽玩覺景馳
明晨復趨府幽賞當反思

早春遊慈恩南池

司空曙

山寺臨池水春愁望遠生踏橋逢鶴起尋竹值泉橫
新柳絲猶短輕蘋葉未成還如虎溪上日暮伴僧行

與侯春時同年南池夜話

許渾

蘆葦暮修修谿鳥上釣舟露涼花斂夕風靜竹含秋
素志應難契清言豈易求相歡一瓢酒明日醉西樓

陪姚合遊金州南池

僧無可

柳暗清波漲衝萍復漱苔張筵白鳥起掃岸使君來
洲島秋應沒荷花晚盡開高城吹角絕騶馭尚徘徊

南池

賈島

蕭條微雨絕荒岸抱清源入舫山偏塞分泉稻接村
秋聲依樹色月影在蒲根淹泊方難遂他宵關夢魂

陪王卿郎中遊南池

韋應物

鷓鴣俱失侶同爲此地遊露浥荷花氣風散柳園秋
煙草凝衰嶼星漢汎歸流林高初上月塘深未轉舟
清言屢往復華樽始獻酬終憶秦川賞端坐起離憂

首夏南池獨酌

白居易

春盡雜英歇夏初芳草深薰風自南至吹我池上林
綠蘋散還合頰鯉跳復沈新葉有佳色殘鶯有好音
依然謝家物池酌對風琴慚無康樂作秉筆思沈吟

境勝才思劣詩成不稱心

報恩寺南池聯句

陸龜蒙

古岸涵碧落

龜蒙

虛軒明素波坐來魚陣變

日吟

久菊

英多秋草分杉露

起高

危橋下竹坡遠峰青髻並

龜蒙

蘇綠髯和趙論寒仍講

日支

研僻亦過齋心曾養鶴

起高

揮翰好邀鵝倚石收竒藥

龜蒙

臨溪藉淺莎桂花晴

似拭

日休

荷鏡曉如磨翠出牛頭聳

起高

苔深馬跡跛傘

歌從野醉

龜蒙

巾側任田歌跣跣松形矮

日休

雙跚檜樾

甞香飛僧印火

起高

泉急使鑣珂菱鈿真堪帖

龜蒙

尊絲

亦好拖幾時無一事

日休

相伴著煙蘿

起高

唐詩類苑卷第三十七

明雲間張之象玄超甫纂輯

雲間徐光啓子先甫編次

雲間王徹叔朗甫補訂

梁谿曹仁孫伯安甫校正

水部

池

府西池

白居易

柳無氣力枝先動池有波生水盡開今日不知誰計
會春風春水一時來

夏至避暑北池

韋應物

晝晷已云極，宵漏自此長。未及施政教，所憂變炎涼。
公門日多暇，是月農稍忙。高居念田里，苦熱安可當。
亭午息群物，獨遊愛方塘。門閉陰寂寂，城高樹蒼蒼。
綠筠尚含粉，圓荷始散芳。于焉灑煩抱，可以對華觴。

晦日益州北池陪宴

司空曙

臨泛從公日，仙舟翠幕張。七橋通碧沼，雙樹接花塘。
玉燭收寒氣，金波隱夕光。野聞歌管思，水靜綺羅香。
遊騎縈林遠，飛橈截岸長。郊源懷灞澹，陂漾寫江潢。
常侍傳花詔，偏裨問羽觴。豈令南峴首，千載播餘芳。

相州前池別許鄭二判官景先神力

張說

數步圓塘水，雙鴻戢羽儀。一飛喬木上，一返故林垂。
淡泊含秋景，虛明抱夜規。無因留絕翰，雲海意差池。

宿興善寺後池

李端

草堂高樹下，月向後池生。野客同僧靜，一作坐新荷共
水平。錦鱗沈不食，繡羽亂相鳴。卽事思江海，誰能萬

里行

題興善寺後池

盧綸

隱隱棲白鳥，似與鏡湖隣。月照何年樹，花逢幾遍人。

岸莎青有路苔徑綠無塵永願容居止僧中老此身
齊安郡後池絕句 杜牧

菱透浮萍綠錦池夏鷺千轉弄薔薇盡日無人看微
雨鴛鴦相對浴紅衣

木蘭後池三詠

皮日休

重臺蓮花

歌紅媿嬌力難任每葉頭邊半米金可得教他水妃
見兩重元是一重心

浮萍

嫩似金脂颺似煙多情渾欲擁紅蓮明朝擬附南風

信寄與湘妃作翠鈿

白蓮

但恐醞醕難竝潔祗應薝蔔可齊香半垂金粉知何
似靜婉臨溪照額黃

奉和木蘭後池三詠

陸龜蒙

重臺蓮花

水國煙鄉足芰荷就中芳瑞此難過風情爲與吳王
近紅萼常教一倍多

浮萍

晚來風約半池明重疊侵沙綠芻成不用臨池重相

笑最無根蒂是浮名

白蓮

素蘂多蒙別艷欺此花真合在瑤池
還應有恨無人覺月曉風清欲墮時

重題後池

皮日休

細雨闌珊眠鷺覺鈿波悠漾竝鴛嬌
適來會得荆王意祗爲蓮莖重細腰

奉和後池

陸龜蒙

曉煙清露暗相和浴鴈浮鷗意緒多
却是陳王詞賦錯枉將心事託微波

池上幽境

白居易

裊裊過水橋微微入林路幽境深誰知
老身閑獨步行行何所愛遇物自成趣
平滑青盤石低密綠陰樹石上一素琴
樹下雙草履此是榮先生坐禪三樂處

池上作

白居易

西溪風生竹森森南潭萍開水沈沈
叢翠萬竿湘岸色空碧一泊松江心
蒲菰縈迴誤遠近橋島向背迷窺臨
澄瀾萬丈若萬頃倒影咫尺如千尋
泛然獨遊邈然坐坐念行心思古今
菟裘不聞有泉沼西河亦恐無雲林
豈如白翁退老地樹高竹密池塘深
華亭

唐詩類苑 卷之三十一
雙鶴白矯矯太湖四石青岑岑眼前盡日更無客
上此時唯有琴洛陽冠蓋自相索誰肯來此同投簪
池上二絕 白居易

山僧對碁坐局上竹陰清映竹無人見時聞下子聲
二

小娃撐小艇偷採白蓮迴不解藏蹤跡浮萍一道開
池上 韋應物

郡中臥病久池上一來賒榆柳飄枯葉風雨倒橫查
京兆公池上作 溫庭筠

稻香山色疊平野接荒陂蓮折舟行遠萍多釣下遲

壞堤泉落處涼簟雨來時京口兵堪用何因入夢思

池上 鄭谷

池榭愜幽獨狂吟學解嘲露荷香自任風竹冷相敲
喪志嫌孤宦無機愛澹交仙山如有分必擬訪三茅

池上 白居易

嫋嫋涼風動淒淒寒露零蘭衰花始白荷破葉猶青
獨立棲沙鶴雙飛照水螢若爲寥落境仍值酒初醒

顧少府池上 曹松

池上分行種公庭覺少塵根離潮水岸韻爽判曹人
正午迴魚影方昏息鷺身無時不動詠滄島思方頻

雨後宿劉司馬池上

賈島

藍溪秋漱玉此地漲清澄
蘆葦聲兼雨芰荷香遶燈
岸頭秦古道亭面漢荒陵
靜想泉根本幽崖落幾層

池上贈韋山人

白居易

新竹夾平流新荷拂小舟
衆皆嫌好拙誰肯伴閑遊
客爲忙多去僧因飯暫留
獨憐韋處士盡日共悠悠
再經故元九相公宅池上作

劉禹錫

故池春又至一到一傷情
鴈鷺群猶下蛙螟衣已生
竹叢身後長臺勢雨來傾
六尺孤安在人未有名

元處士池上

溫庭筠

蓼穗菱叢思蟪蛄水螢江鳥滿
煙蒲愁紅一片風前落
池上秋波似五湖

池上偶興二絕

白居易

濠梁相會謾相爭未必人情知
物情獺浦魚來魚躍出此非魚樂
是魚驚水淺魚稀白鷺饑
勞心澄目待魚時外容閒暇中心
苦似是而非誰得知

池上卽事

白居易

移牀避日依松竹解帶當風掛
薜蘿鈿砌池心綠萍

唐詩集卷之二十七
合粉開花面白蓮多久陰新霽宜絲管苦熱初涼入
綺羅家醞瓶空人客絕今宵爭柰月明何

池上小宴問程秀才

白居易

洛下林園好自知江南境物暗相隨淨淘紅粒罽香
飯薄切紫鱗烹水葵雨滴篷聲青雀舫浪搖花影白
蓮池停杯一問蘇州客何似吳淞江上時

池上夜境

白居易

晴空星月落池塘澄鮮淨綠表裏光露簟清瑩迎夜
滑風襟瀟灑先秋涼無人驚處野禽下新睡覺時幽
草香但問塵埃能去否濯纓何必向滄浪

池上閑吟二首

白居易

高臥閑行自在身池邊亦見柳條新幸逢堯舜無爲
日得作羲皇向上人四皓再除猶且健三川罷守未
全貧莫愁客到無供給家醞香濃野菜春
非庄非宅非蘭若竹樹池亭十畝餘非道非僧非俗
吏褐裘烏帽閉關居夢遊信意寧殊蝶心樂身閑便
是魚雖未定知生與死其間勝負兩何如

池上逐涼二首

白居易

青苔地上銷殘暑綠樹陰前逐晚涼輕屐單衣薄紗
帽淺池平岸庫藤牀簪纓恠我情何薄泉石諳君味

甚長徧問交親爲老計多言宜靜不宜忙
牕間睡足休高枕水畔閑來上小船
棹遣禿頭奴子撥茶教織手侍兒煎
門前便是紅塵地林外無非赤日天
誰信好風清簟上更無一事但翛然

池上卽事

白居易

行尋甃石引新泉坐看修橋補釣船
綠竹掛衣涼處歇清風展簟困時眠
身閑富貴真天爵心散無憂卽地仙
林下水邊無厭日便堪終老豈論年

池畔二首

白居易

池西廊疏理池東樹此意人不知
欲爲待月處

二

持刀開密竹竹少風來多此意人不會
欲令池有波

池邊

白居易

柳老香絲宛荷新細扇圓殘春深樹裏
斜日小樓前醉遣收杯杓閑聽理管絃
池邊更無事看補採蓮船

池邊卽事

白居易

羶帳胡琴出塞曲蘭塘越棹弄潮聲
何言此處同風月蘄北江南萬里情

池邊

李商隱

玉管葭灰細細吹流鶯上下燕參差
日西千遶池邊

樹憶把枯條撼雪時

臨池閑臥

白居易

小竹圍庭匝平池與砌連閑多臨水坐老愛向陽眠
營役拋身外幽竒送枕前誰家臥牀脚解繫釣魚船

臨池曲

孟郊

池中春蒲葉如帶紫菱成角蓮子大羅裙蟬鬢寄迎
風雙雙伯勞飛向東

題黃帝鼎池

徐凝

黃帝上昇之所鼎湖蓋黃帝鑄鼎處也有池在山
頂

黃帝旌旗去不迴空餘片石碧崔嵬有時風捲鼎湖
浪散作晴天雨點來

開襟

白居易

開襟何處好竹下池邊地餘熱體猶煩早涼風有味
黃萎槐蘂結紅破蓮方墮無柰每年秋先來入衰思
津

楊子津望京口

孟浩然

北固臨京口夷山近海濱江風白浪起愁殺渡頭人

楊子津

盧仝

風捲魚龍暗楚關白波沈却海門山鵬騰鰲倒且快

性地坼天開總是閑

九龍津集

盧照隣

落落樹陰紫澄澄水華碧復有翻飛禽徘徊疑曳鳥
旅泊新津却寄一二知己 溫庭筠

維舟息行役霽景近江村併起別離恨似聞歌吹喧
高林月初上遠水霧猶昏王粲平生感登臨幾斷魂

晚泊蒲類津

駱賓王

二庭歸望斷萬里客新愁山路猶南屬河源自北流
晚風連朔氣新月照邊秋竈火通軍壁烽煙上戍樓
龍庭但苦戰燕領會封侯莫使蘭山下空令漢國羞

春日江津遊望

杜審言

旅客搖邊思春江弄晚晴烟銷垂柳弱霧捲落花輕
飛棹乘空下回流向日平鳥啼移幾處蝶舞亂相迎
忽嘆人皆濁隄防水至清谷王常不讓深戒日中盈

與黃侍御泛北津

孟浩然

津無蛟龍患日夕常安流本欲避驄馬何知同鷁舟
豈伊今日幸曾是昔年遊莫奏琴中鶴且隨波上鷗
堤緣九里郭山面百層樓自顧躬耕者才非管樂儔
聞君薦草澤從此泛滄洲

過津口

杜甫

唐言類苑 卷之三十
南岳自茲近湘流東逝深和風引桂楫春日漲雲岑
回道過津口而多楓樹林白魚困密網黃鳥喧嘉音
物微限通塞惻隱仁者心甕餘不盡酒膝有無聲琴
聖賢兩寂寞耿耿獨開襟

潭

萬丈潭

杜甫

青溪合冥冥神物有顯晦龍依積水蟠窟壓萬丈內
跼步凌垠堦側身下煙靄前臨洪濤寬却立蒼石大
山危一徑盡岸絕兩壁對削成根虛無倒影垂澹瀨
黑知灣濶底清見光炯碎孤雲倒來深飛鳥不在外

高蘿成帷幄寒水疊旌旆遠川曲通流嵌竇潛洩瀨
造幽無人境發興自我輩告歸遺恨多將老斯遊最
閉藏修鱗蟄出入巨石礙何事炎天過快意風雨會

落星潭

李白

涇溪南藍山下有落星潭可以卜築余泊舟石上
寄何判官昌浩

藍岑竦天壁突兀如鯨額奔蹙橫澄潭勢吞落星石
沙帶秋月明水搖寒山碧佳境宜緩棹清輝能留客
恨君阻歡娛使我自驚惕所期俱卜築結茅鍊金液
與周剛清溪玉鏡潭宴別 李白

康樂上官去永嘉遊石門江亭有孤嶼千載跡猶存
我來憇秋浦三入桃陂源千峰照積雪萬壑盡啼猿
興與謝公合文因周子論掃厓去落葉席月開清樽
溪當大樓南溪水正南奔廻作玉鏡潭澄明洗心魂
此中得佳境可以絕囂喧清夜方歸來酣歌出平原
別後經此地爲余謝蘭蓀

發漁浦潭

孟浩然

東旭早光芒渚禽已驚聒臥聞漁浦口橈聲暗相撥
日出氣象分始知江路濶美人常晏起照影弄流沫
飲水畏驚猿祭魚時見獺舟行自無悶况值晴景豁

同太平公主遊九龍潭

武后

山牕遊玉女澗戶對瓊峰巖頂翔雙鳳潭心倒九龍
酒中浮竹葉杯上寫芙蓉欲驗山家賞唯有入松風
與諸道者同遊二室至九龍潭作

白居易

喜逢二室遊仙子厭作三川守土臣舉手摩挲潭上
石開襟抖擻府中塵他日終爲獨往客今朝未是自
由身若言尹是嵩山主三十六峰應笑人

龍潭

僧應物

石激懸流雪滿灣五龍潛處野雲閑暫收雷電九峰

唐詩類苑 卷之三十七
下且飲溪潭一水間浪引浮槎依北岸波分曉日浸
東山回瞻四面如看盡須信遊人不欲還

葛山潭

孫逖

圓潭寫流月清明涵萬象仙翁何時還綠水空蕩漾
涼哉草木腓白露沾人衣猶醉空山裏時聞笙鶴飛

春日遊羅敷潭

李白

行歌入谷口路盡無人躋攀崖度絕壑弄水尋迴溪
雲從石上起客到花間迷淹留未盡興日落群峰西

萬山潭

孟浩然

垂釣坐盤石水清心亦閑魚行潭樹下猿臥島藤間

遊女昔解佩傳聞于此山求之不可得
泂月棹歌還

峴潭作

孟浩然

石潭傍隈隩沙岸曉夤緣試垂竹竿釣果得槎頭鱖
美人騁金錯纖手膾紅鮮因謝陸內史尊羹何足傳

登白馬潭

杜甫

水生春纜波日出野船開宿鳥行猶去花叢笑不來
人人傷白首處處接金杯莫道新知要南征且未迴

春遊東潭

盧綸

移舟試望家漾漾似天涯日暮滿潭雪白鷗和柳花

從鄭郎中高州遊東潭

劉滄

煙嵐晚入濕旌旗高檻風清醉未歸夾路野花迎馬
首出林山鳥向人飛一谿寒水涵清淺幾處晴雲度
翠微自是謝公心近得登樓望月思依依

汝州南潭陪陸中丞公讌 孟郊

一雨百泉漲南潭夜來深分明碧沙底寫出青天心
遠客洞庭至因茲滌煩襟旣登飛雲舫願奏清風琴
高岸立旗戟潛蛟失浮沈威稜護斯浸颺颺迹所侵
山態變初霽水聲流新音耳目極眺聽潺湲與嶽岑
誰言柳太守空有白蘋吟

南潭

李昌符

匝岸青蕪掩古苔面山亭榭枕潭開有時絃管收筵
促無數鳧鷖逆浪來路入龍祠群木老風驚漁艇一
聲迴人傳郭擘多游此誰見當初泛玉杯

與幼遐君貺兄弟同遊白家竹潭

韋應物

清賞非素期偶遊方自得前登絕嶺險下視深潭黑
密竹已成暮歸雲殊未極春鳥依谷暄紫蘭含幽色
已將芳景遇復款平生憶終念一歡別臨風還默默

題玉潭

獨孤及

碧玉徒強名水壺難比德唯當寂照心可竝齋淪色

與暢當夜泛秋潭

盧綸

螢火颺蓮藜水涼多夜風離人將落葉俱在一船中

泊江潭貽馬校書

儲光羲

明月挂青天遙遙如目前故人遊畫閣却望似雲邊
水宿依漁父歌聲好采蓮采蓮江上曲今夕為君傳

宿潭上二首

暢當

夜潭有何舸與月當水中佳賓愛明月遊子驚秋風

二

青浦野陂水白露明月天夜中秋風起心事坐潛然

對小潭寄遠上人

白居易

小潭澄見底閑客坐開襟借問不流水何如無念心
彼惟清且淺此乃寂而深是義誰能答明朝問道林

湍

尋龍湍

孫逖

仙穴尋遺跡輕舟愛水鄉溪流一曲盡山路九峰長
魚火歌金洞江妃舞翠房遙憐葛仙宅真氣共微茫

同邢判官尋龍湍觀歸湖中

孫逖

星使下天京雲湖喜晝晴更從探穴處還作棹歌行
絲管荷風入簾帷竹氣清莫愁歸路遠水月夜虛明

賦得荆溪夜湍送蔣逸人歸義興

皇甫冉

驚湍流不極夜度識雲岑長帶溪沙淺時因山雨深
方同七里路更逐五湖心揭厲朝將夕潺湲古至今
花源若可許雖遠亦相尋

灘

下桂江龍目灘

宋之問

停午出灘險輕舟容易前峰攢入雲樹崖噴落江泉
巨石潛山恠深篁隱洞仙鳥遊溪寂寂猿嘯嶺娟娟
揮袂日凡幾我行途已千暝投蒼梧郡愁枕白雲眠

宿龍宮灘

韓愈

浩浩復湯湯灘聲抑更揚奔流移激電驚浪似浮霜
夢覺燈生暈宵殘雨送涼如何連曉語一半是思鄉

開龍門八節石灘詩二首

并序

白居易

東都龍門潭之南有八節九峭石船筏過此倒反
破傷舟人楫師推挽束縛大寒之月裸跣水中饑
凍有聲聞于終夜予嘗有願力及則救之會昌四
年有悲智僧道遇適同發心經營開鑿貧者出力
仁者施財於戲從古有礙之險未來無窮之苦忽

乎一旦盡除去之茲吾所用適願快心拔苦施樂者耳豈獨以功德福報爲意哉因作二詩刻題石上以其地屬寺事因僧故多引僧言見志
鐵鑿金鎚殷若雷八灘九石劍稜摧竹篙桂檝飛如箭百筏千艘魚貫來振錫道師憑衆力揮金退傅施家財他時相逐西方去莫慮塵沙路不開
七十三翁旦暮身誓開險路作通津夜舟過此無傾覆朝脛從今免苦辛十里叱灘變河漢八寒陰獄化陽春我身雖歿心長在闍施慈悲與後人

下涇縣陵陽溪至澀灘

李白

江漢鳴嘈嘈兩山足猿猱白波若捲雪側石不容舟
漁人與舟人撐折萬張篙

下陵陽公高溪三門六刺灘

李白

三門橫峻灘六刺走波瀾石驚虎伏起水狀龍縈盤
何慚七里灘使我欲垂竿

嚴陵灘下寄常建

奚賈

日入溪水靜靜真此亦難乃知滄洲人道成仍釣竿
漾檝坐微月振衣生早寒紛吾誠獨往自速耽考槃
已息漢陰誚且同濠上觀曠然心無涯借問容膝安

七里灘重送

劉長卿

登高復送遠惆悵洞庭秋風景一作水同前古雲山滿

上游蒼蒼來暮雨淼淼逐寒流今日關中事蕭何共

爾憂

晚泊七里灘

許渾

天晚日沈沈歸舟繫柳陰江村平見寺山郭遠聞砧

樹密猿聲響波澄鴈影深榮華暫時事誰識子陵心

暮發七里灘夜泊嚴光臺下

方干

一瞬卽七里箭馳猶是難檣邊走嵐翠枕底失風湍

但訝猿鳥定不知霜月寒前賢竟何益此地誤垂竿

至七里灘作

李嘉祐

遷客投於越臨江淚滿衣獨隨流水遠轉覺故人稀

萬木迎秋序千峰駐晚暉行舟猶未已惆悵暮潮歸

却歸睦州至七里灘下作

劉長卿

南歸猶謫宦獨上子陵灘江樹臨洲晚沙禽對水寒

山開斜照在石淺亂流難惆悵梅花發年年此地看

經七里灘

孟浩然

予奉垂堂誠千金非所輕為多山水樂頻作泛舟行

五岳追尚子三湘弔屈平湖經洞庭濶江入新安清

唐詩類考 卷之三十一
復聞嚴陵瀨乃在此川路湍障數百里
汭澗非一趣彩翠相氛氲別流亂奔注
釣磯平可坐踏蹬滑難步
援飲石下潭鳥還日邊樹觀竒恨來晚
倚棹惜將暮揮手弄潺湲從茲洗塵慮

嚴陵灘

羅隱

中都九鼎動英髦漁釣牛簑且遁逃
世祖昇遐天子死原陵不及釣臺高

南昌灘

元稹

渠江明淨峽透迤船到明灘拽笊遲
櫓竅動搖妨作夢兒童指點笑吟詩
畚餘宿麥黃山腹日背殘花白

水湄物色可憐心莫恨此行都是獨行時

題牛相公歸仁里宅新成小灘

白居易

平生見流水見此轉留連况此朱門內
君家新引泉伊流決一帶洛石砌千拳
與君三伏身滿耳作潺湲深處碧磷磷
淺處清濺濺碕岸東嗚咽沙汀散淪連
翻浪雪不盡澄波空共鮮兩崖灩澦口
一泊瀟湘天曾作天南客漂流六七年
何山不倚杖何水不停船巴峽聲心裏
松江色眼前今朝小灘上能不思悠然

新小灘

白居易

唐言類苑 卷之三十一
石淺沙平流水寒水邊斜插一漁竿江南客見生鄉
思道似嚴陵七里灘

灘聲

白居易

碧玉班班沙歷歷清流泱泱響泠泠自從造得灘聲
後玉管朱絃可要聽

瀨

石頭瀨作

崔國輔

悵矣秋風時余臨石頭瀨日高見超遠望盡北州內
羽山數點青海岸雜光碎離離樹木少漭漭波潮大
日暮千里帆南飛落天外須臾遂入夜楚色有微靄

尋遠跡已窮遺榮事多昧一身猶未理安得濟當代
且泛朝夕潮荷衣蕙爲帶

嚴子瀨東送馬處直歸蘇

劉長卿

望君舟已遠落日潮未退目送滄海帆人行白雲外
江中遠回首波上生微靄秋色姑蘇臺寒流子陵瀨
相送苦易散動別知難會從此日相思空令減衣帶

答劉長卿七里瀨重送

嚴維

新安非欲枉帆過海內如君有幾何醉裏別時秋水
色老人南望一狂歌

使還七里瀨上逢薛承規赴江西貶

遷客歸人醉晚寒孤舟暫泊子陵灘
憐君更去三千里落日青山江上看

劉長卿

洲

宿白鷺洲寄楊江寧

李白

朝別朱雀門暮棲白鷺洲
波光搖海月星影入城樓
望美金陵宰如思瓊樹憂
徒令魂作夢翻覺夜成秋
綠水解人意爲予西北流
因聲玉琴裏蕩漾寄君愁

夜泊鸚鵡洲

錢起

月照溪邊一罩篷
夜聞清唱有微風
小樓深巷敲方

響水國人家在處同

鸚鵡洲送王九遊江左

孟浩然

昔登江上黃鶴樓
遙愛江中鸚鵡洲
洲勢逶迤繞碧流
鴛鴦鸕鶿滿沙頭
灘頭月落沙磧長
金沙耀耀動颼光
舟人牽錦纜浣女結衣裳
月明全見蘆花白
風起遙聞杜若香
君行采采莫相忘

鸚鵡洲

李白

鸚鵡來過吳江水
江上洲傳鸚鵡名
鸚鵡西飛隴山去
芳洲之樹何青青
煙開蘭葉香風暖
岸夾桃花錦浪生
遷客此時徒極目
長洲孤月向誰明

鷓鴣洲卽事

崔塗

悵望春襟鬱未開重吟鷓鴣益堪哀曹瞞尚不能容
物黃祖何曾解愛才幽鳥暖聞燕鴈去曉江晴覺蜀
波來何人正得風濤便一點輕帆萬里迴

題白蘋洲

杜牧

山鳥飛紅帶亭薇拆紫花溪光初透徹秋色正清華
靜處知生樂喧中見死誇無多珪組累終不負煙霞

廬山桑落洲

胡玠

莫問桑田事但看桑落洲數家新住處昔日大江流
古岸崩欲盡平沙長未休想應百年後人世更悠悠

西洲詞

溫庭筠

悠悠復悠悠昨日下西洲西洲風色好遙見武昌樓
武昌何鬱鬱儂家定無匹小婦被流黃登樓撫瑤瑟
朱絃繁復輕素手直淒清一彈三四解掩抑似含情
南樓登且望西江廣復平艇子搖兩漿催過石頭城
門前烏臼樹慘澹天將曙鷓鴣飛復還郎隨早帆去
迴頭語同伴定復負情儂去帆不安幅作抵使西風
他日相尋索莫作西洲客西洲人不歸春草年年碧
桂陽西洲晚泊贈古橋村主人

劉長卿

洛陽別離久江上心可得惆悵增暮情瀟湘復秋色
故山隔何處落日羨歸翼滄海空自流白鷗不相識
悲蟬滿荆渚輟棹徒沾臆行客念寒衣主人愁夜織
帝鄉片雲去遙寄千里憶南路隨天長征帆杳無極

三洲詞

温庭筠

團圓莫作波中月潔白無爲枝上雪月隨波動碎
潏潏雪似梅花不堪折李娘十六青絲髮畫帶雙花爲
君結門前有路輕別離唯恐歸來舊香滅

春洲曲

温庭筠

韶光染色如娥翠綠濕紅鮮水容媚蘇小慵多蘭渚

閑融融浦日鳩鵲寐紫騮蹀躞金銜嘶堤上揚鞭煙
草迷門外平橋連柳堤歸來晚樹黃鸝啼

月洲歌送趙列還襄陽

皇甫冉

漢之廣矣中有洲洲如月兮水環流流聒聒湍與瀨
草青青兮春更秋苦竹林香楓樹樵子鼠師幾家住
萬山飛雨一川來巴客歸船傍洲去歸人不可遲芳
杜滿洲時無限風煙皆自悲莫辭貧賤阻心期家住
洲頭定近遠朝泛輕橈暮當返不能隨爾臥芳洲自
念天機一何淺

次晚洲

杜甫

參錯雲石稠陂陀風濤壯晚洲適知名秀色固異狀
棹經垂猿把身在度鳥上擺浪散帙妨危沙拆花當
羈艱暫愉悅羸老反惆悵中原未解兵吾得終疎放
渚

後渚置酒

陳叔達

大渚初驚夜中流沸鼓輦寒沙滿曲浦夕霧上耶溪
岸廣鳧飛急雲深鴈度低巖關猶未遂此夕待晨鷄

銅官渚守風

杜甫

不夜楚帆落避風湘渚間水耕先浸草春火更燒山
早泊雲物晦逆行波浪慳飛來雙白鶴過去杳難攀

曉入宜都渚

閻寬

問俗周楚甸川行渺江潯興隨曉光發道會春言深
回眺佳氣象遠懷得山林佇應舟楫用曷務歸閑心
源

遊桃源一百韻

劉禹錫

沅江清悠悠連日鬱岑寂回流抱絕巘皎鏡含虛碧
昏旦遞明媚煙嵐分委積香蔓垂綠潭暴龍照孤磧
淵明著前志子驥思遠蹠寂寂無何鄉密爾天地隔
金行太元歲漁者偶探陟尋花得幽踪窺洞穿闔隙
依微聞鷄犬豁達直阡陌居人互相迎笑語如平昔

廣樂雖交奏海禽心不憚揮手一來歸故溪無處覓
緜緜五百載市朝幾遷革有路在壺中無人知地脉
皇家感至道聖祚自天錫金闕傳本枝玉函留寶曆
禁山開祕宇復戶潔靈宅藥檢香氛氲醮壇煙幕幕
我來塵外躅瑩若朝星折崖轉對翠屏水窮留畫鷁
三休俯喬木千級扳峭壁旭日聞撞鐘綵雲迎躡屐
遂登最高頂縱目還楚澤平湖見青草遠岸連霞赤
幽尋如夢想緜思屬空閭夤緣且忘疲耽玩近成癖
清猿俟朝發瑤草凌寒折祥禽舞葱蘢珠樹搖玃瓌
羽人顧我笑勸我稅歸輶霓裳何飄颻童顏潔白哲

重巖是藩屏馴鹿受羈勒樓居彌清霄蘿葛成翠帟
仙翁遺竹杖王母留桃核姹女飛丹砂青童護金液
寶氣浮鼎耳神光生劍脊虛無天樂來僊宰鬼兵役
丹丘肅朝禮五禮工紉繹枕中淮南方牀下阜卿舄
明鐙坐遙夜幽籟聽浙瀝因話近世仙聳然心神惕
乃言瞿氏子骨狀非凡格往事黃先生群兒多侮劇
警然不屑意元氣貯肝膈往往游不歸洞中觀博奕
言高未易信猶復加訶責一旦前致辭自云仙期迫
言思有道骨前事常被謫如今三山上名字在真籍
悠然謝主人後歲當來覲言畢依庭宇如烟去無跡

觀者皆失次驚追紛絡繹日暮山徑窮松風自蕭槭
適逢修蛇見睛目光激射如嚴三清居不使恣搜索
唯餘涉江勢八趾在沙礫至今東北隅表以壇上石
列仙徒有名世人非目擊如何庭廡際白日振羽翮
洞天豈幽遠得道如咫尺一氣無死生三光自遷易
因思人間世前路何狹窄瞥然此生中善祝期滿百
大方播羣類秀氣肖翕闢性靜本同和物牽成阻阨
是非鬪方寸葷血昏精魄遂令多天傷猶喜見斑白
喧喧車馬馳冉冉桑榆夕共安緹綉榮不悟泥途適
紛吾本孤賤世業在逢掖九流宗指歸百氏旁攬撫

公卿偶慰薦鄉曲繆推擇居安白社貧志傲玄纁辟
功名希自取簪組俟揚歷書府蚤懷鈇射宮曾發的
起草香生帳坐曹烏集栢賜燕聆簫韶侍祠閱琮璧
嘗聞履忠信可以行蠻貊自述希古心妄恃干時畫
巧言忽成錦苦志徒食藥平地生峰巒深心有矛戟
曾波一震盪弱植忽淪溺北渚弔靈均長岑思亭伯
禍來昧幾兆事去空歎息塵累與時深流年隨漏滴
才能疑木鴈報施迷夷路楚奏擊鍾儀商歌勞甯戚
稟生非懸解對涼方感激自從嬰禍羅每事問龜策
不正降雷雨環玦賜遷斥儻伏夷平人誓將羽衣客

唐詩類苑卷第三十七
買山構精舍領徒問講席冀無身外憂自有閒中益
道牙期日就塵慮乃冰釋且欲遺姓名安能慕竹帛
長生尚學致一暨豈虛擲芝朮資糗糧煙霞拂巾幘
黃石履看墮洪崖肩有拍聊復嗟蟬蛸何煩哀虺蜴
青囊既深味瓊葩亦屢摘總無西山資猶免長戚戚

唐詩類苑卷第三十七終

唐詩類苑卷第三十八

明雲間張之象玄超甫纂輯

雲間徐光啓子先甫編次

雲間王徹叔朗甫補訂

梁谿曹仁孫伯安甫校正

水部

灣

梅灣

顧況

白石盤盤磴清香樹樹梅山深不吟賞孤負委蒼苔

溝

御溝

王貞白

一派御溝水綠槐相蔭清此波涵帝澤無處濯塵纓
鳥道來雖險龍池到自平朝宗心本切願向急流傾

同沈駙馬賦得御溝水

李賀

入苑白泱泱宮人正靨黃遶堤龍骨冷拂岸鴨頭香
別館驚殘夢停杯泛小觴幸因流浪處暫得見何郎

題壽安縣甘棠館御溝

杜牧

一渠東注芳華苑苑鎖池塘百歲空水殿半傾蟾口
澀為誰流下蓼花中

御溝水

僧無可

鑿禁疏雲數道開垂風岸柳拂青苔銀波玉沫空池
去曾歷千巖萬壑來

過鴻溝

韓愈

龍疲虎困割川原億萬蒼生性命存惟勸君王回馬
首真成一擲賭乾坤

鴻溝

許渾

相持未定各為一作懷君秦政山河此地分力盡烏江
千載後古溝荒草起寒雲

渡

初至崖口五渡

宋之問

崖口衆山斷欽崙聳天壁氣衝落日紅影入春潭碧
錦續織苔蘚丹青畫松石水禽泛容與巖花飛的皪
微路從此深我來恨于役惆悵情未已群峯暗將夕
入崖口五渡寄李適徐彥伯

宋之問

抱琴登絕壑伐木泝清川路極意謂盡勢迴趣轉綿
人遠草木秀山深雲影鮮余負海嶠情自昔微尚然
彌曠十餘載今來宛仍前未窺仙源極獨進野人船
時攀乳竇憇屢薄天牕眠夜絃響松月朝楫弄苔泉
因冥泉外理永謝區中緣碧潭可遺老丹砂堪學仙

莫使馳光暮空令歸鶴憐

答宋十一入崖口五渡見贈

李適

聞君訪遠山躋險造幽絕眇然青雲境觀竒彌年月
登嶺亦泝溪孤舟事沿越嶿嶂傳彩翠崖磴互欹缺
石林上攢叢金澗下明滅捫壁窺丹井梯苔瞰乳穴
忽枉巖中贈對翫未嘗輟殷勤獨往事委曲煉藥說
邀余名山期從爾泛海渤歲晏秉宿心斯言匪張設
答宋十一入崖口五渡見贈

徐彥伯

聞有獨往客拂衣捐世心結忻薄枉渚撰念營舊林
經亘去崖合冥綿歸壑深琪樹環碧彩金潭生翠陰
洄泐弄沙榜危仄眺明岑夕聞桂裏猿曉翫松上禽
雜珮蘊孤袖瓊敷綴雙衿我懷滄洲想懿爾白雲吟
秉願理方叶存期跡易尋茲言庶不負爲報巖中琴

早過漆林渡寄萬巨

李 白

西京大藍山南來漆林渡水色倒空青林煙橫積素
漏流昔吞翕沓浪競奔注潭落天上星龍開水中霧
嶢巖注公柵突兀陳焦墓嶺峭紛上千川明屢迴顧
因思萬夫子解渴同瓊樹何日覩清光相歡詠佳句

白沙渡

杜 甫

畏途隨長江渡口下絕岸差池上舟楫杳窅入雲漢
天寒荒野外日暮中流半我馬向北嘶山猿飲相喚
水清石礪礪沙白灘漫漫迴然洗愁辛多病一疎散
高壁抵嶽峯洪濤越凌亂臨風獨回首攬轡復三歎

水會渡

杜 甫

山行有常程中夜尚未安微月沒已久崖傾路何難
大江動我前洶若溟渤寬篙師暗理楫歌笑輕波瀾
霜濃木石滑風急手足寒入舟已千憂陟巘仍萬盤
迴眺積水外始知衆星乾遠遊令人瘦衰疾慙加餐

枯栢渡

杜甫

青冥寒江渡，駕竹爲長橋。竿濕煙漠漠，江水風蕭蕭。
連竿動嫋娜，征衣颯颯。急流鳴鵠散，絕岸鼉鼉驕。
西轅自茲異，東逝不可要。高通荆門路，闊會滄海潮。
孤光隱顧眄，遊子悵寂寥。無以洗心胸，前登但山椒。

沙苑南渡頭

王昌齡

秋霧連雲白，歸心浦溆懸。津人空守纜，村館復臨川。
蓬隔蒼茫雨，波通演漾田。孤舟未得濟，入夢在何年。

利州南渡

溫庭筠

澹然空水對斜暉，曲島蒼茫接翠微。波上馬嘶看棹

去，柳邊人歇待船歸。數叢沙草群鷗散，萬頃江田一
鷺飛。誰解乘舟尋范蠡，五湖煙水獨忘機。

送諫議十六叔至孝義渡後奉寄

孟郊

曉渡明鏡中，霞衣相飄颻。浪鳧驚亦雙，蓬客將誰僚。
別飲孤易醒，離憂壯難銷。文清雖無敵，儒貴不敢驕。
江吏捧紫泥，海旗剪紅蕉。分明太守禮，跨躡毘陵橋。
伊洛去未迴，遐矚空寂寥。

至孝義渡寄鄭軍事唐二十五

孟郊

唐詩類苑 卷之二十一
五
咫尺不得見心中空嗟嗟官街泥水深下脚道路斜
嵩少玉峻峻伊雒碧華華岸亭當四迴詩老獨一家
洧叟何所如鄭食唯有些何當來說事爲君開流霞

乘月過西郊渡

韋應物

遠山含紫氛春野靄云暮值此歸時月留連西澗渡
謬當文墨會得與群英遇賞逐亂流翻心將清景悟
行車儼未轉芳草空盈步已舉堠亭火猶愛村原樹
還當守故局悵恨乘幽素

再遊西郊渡

韋應物

水曲一追遊遊人重懷戀嬋娟昨夜月還向波中見

驚禽棲不定流芳寒未徧攜手更何時佇看花似霰

壽安西渡奉別鄭公二首 孟郊

洛河向西道石波橫磷磷清風送君子車遠無還塵
春別亦蕭索况茲冰霜晨零落景易入鬱抑抱難申
百宵華燈宴一旦星散人歲去絃吐箭憂來蠶抽綸
綿綿無窮事各各馳遶身徘徊黃縹緲倏忽春霜賓
相爲物表物永謝區中姻日嗟來教士仰望無由親

二

東都清風減君子西歸朝獨把歲晏恨泗吟不成謔
貴遊意多味賤別情易消迴鴈憶前叫浪鳧念後漂

唐言類及 卷之三十六
悠悠孤飛景聳聳銜霜條昧趣多滯澀嬾朋寡新僚
病深理方悟悔至心自燒寂靜道何在憂勤學空饒
乃知滅聞見始遂情逍遙文字徒營織聲華諒疑驕
顧慙耕稼士朴略氣韻調善士有餘食佳畦冬生苗
養人在養身此旨清如韶願貢高古言敢望錫類招

酬王侍御西陵渡見寄

嚴維

前年萬里別昨日一封書郢曲西陵渡秦官使者車
柳塘熏晝日花水溢春渠若不嫌雞黍先令掃敝廬

南浦渡口

李嘉祐

寂寞橫塘路新篁覆水低東風潮信滿時雨稻稭齊

寡婦供租稅漁人逐鼓輦慙無卓魯術解印謝黔黎

早發壽安次永壽渡

許渾

東西車馬塵鞞洛與咸秦山月夜行客水煙朝渡人
樹涼風浩浩灘淺石磷磷會待功名就扁舟寄此身

橫龍渡

劉長卿

空傳古岸下曾見蛟龍去秋水晚沈沈獨疑在何處
亂聲沙上石倒影雲中樹獨見一扁舟樵人往來渡

泊松江渡

許渾

漠漠故宮地月涼風露幽

一作雲木幽

鷄鳴荒戍曉

一作明

鴈過古城秋楊柳北歸路蒹葭南渡舟去鄉今已遠

唐詩卷之二十八
更上望京樓

晚泊漢江渡

劉 畋

末秋雲木輕蓮拆晚香清雨下侵苔色雲涼出浪聲
疊帆依岸盡微照映堤明渡吏已頭白遙知客姓名

送李鏡之宣州謁袁中丞賦得江渡

張衆甫

古渡大江濱西南押要津自當舟楫路應濟往來人

飛浪驚飛鳥回風起綠鱗一作君看波上客歲晚獨

垂綸

雨晴至江渡

柳宗元

江雨初晴思遠步日西獨向愚溪渡渡頭水落村逕
成撩亂浮槎在高樹

沐陽古渡作

錢 起

日落問津處雲霞殘碧空牧牛避田燒退鷁隨潮風
迴首故鄉遠臨流此路窮翩翩青冥去羨彼高飛鴻

沙

度破訥沙二首

李 益

眼見風來沙旋移經年不省草生時莫言塞北無春
到總有春來何處知

破訥沙頭鴈正飛鷓鴣泉上戰初歸平明日出東南

唐詩類苑 卷之三十一
地滿磧寒光生鐵衣

堤

汴堤行

韋莊

欲上隋堤舉步遲
隔雲烽燧叫非時
纔聞破虜將休馬
又道征遼再出師
朝見西來爲過客
暮看東去作浮屍
綠楊千里無飛鳥
日落空投舊店基

隋堤

秦韜玉

種柳開河爲勝遊
堤前常使路人愁
陰埋野色萬條思
翠束寒聲千里秋
西日至今悲兔苑
東波終不反龍舟
遠山應見繁華事
不語青青對水流

魏堤有懷

白居易

魏王堤下水聲似
使君灘惆悵迴頭聽
踟躕立馬看蕩風
波眼急翻雪浪心寒
憶得瞿塘事重吟
行路難

魏王堤

白居易

花寒嬾發鳥慵啼
信馬閑行到日西
何處未春先有思
柳條無力魏王堤

具興新堤

朱慶餘

春堤一望思無涯
樹勢還同水勢斜
深映菰蒲三十里
晴分功利幾千家
謀成既不勞人力
境遠偏宜隔浪花
若與青山長作固
汀洲肯恨柳絲遮

大堤曲

李賀

妾家住橫塘紅紗滿桂香青雲教縮頭上髻明月與
作耳邊瑤蓮風起江畔春大堤上畱北人郎食鯉魚
尾妾食猩猩脣莫指襄陽道綠浦歸帆少今日菖蒲
花明朝楓樹老

沙堤行呈裴相公

張籍

長安大道沙爲堤早風無塵晚無泥宮中玉漏下三
刻朱衣導騎丞相來路傍高樓息歌吹千車不行行
者避街官閭吏相傳呼當前十里惟空衢白麻詔下
移相印新堤未成舊堤盡

堤上吟

馬植

截竹爲筒作笛吹鳳凰池上鳳凰飛勞君更向黔南
去卽是陶鎔萬類時

堤上行二首

張籍

酒旗相望大堤頭堤下連檣堤上樓日暮行人爭渡
急漿聲幽軋滿中流

江南江北望煙波入夜行人相應歌桃葉傳情竹枝
怨水流無限月明多

堤上行

劉禹錫

春堤繚繞水徘徊酒舍旗亭次第開日晚上樓招估

唐詩類苑 卷之三十一
客峨舸大編落颿來

暮行河堤上

韓愈

暮行河堤上四顧不見人
衰草際黃雲感歎愁我神
夜歸孤舟卧展轉空及晨
謀計竟何就嗟嗟世與身

潮

潮

白居易

早潮纔落晚潮來一月周流六十迴
不獨光陰朝復暮杭州老去被潮催

錢塘江潮

羅隱

怒聲洶洶勢悠悠羅剎江邊地
欲浮漫道往來存大

信也知返覆向平流任拋巨浸疑無底
猛過西陵只
有頭至竟朝昏誰主掌好騎神鯉問陽侯

踏潮歌

并引

劉禹錫

元和十年夏五月終風駕濤南海羨溢南人曰踏潮也
率三更歲一有之余爲連州客或爲予言其狀因歌之附于南越志

屯門積日無回颿滄波不歸成踏潮轟如鞭石斫且
搖巨空欲駕鼉鼉橋驚湍蹙縮悍而驕大陵高岸失
岩嶢四邊無阻音響調背負元氣掀重霄介鯨得性
方逍遙仰鼻嘘吸揚朱翹海人狂顧迭相招剡衣璧

首聲曉曉征南將軍登麗譙赤旗指麾不敢囂翌日
風回沴氣消歸濤納納景昭昭鳥沈白沙復滿海海
色不動如青瑤

濤

看濤

朱慶餘

不知來遠近但見白峨峨風雨驅飛玉魚龍迸上波
聲長勢未盡曉去夕還過要路橫天塹其如造化何

樟亭觀濤

宋昱

濤來勢轉雄獵獵駕長風雷震雲霓裏山飛霜雪中
激流起平地吹滂上侵空翕闢乾坤異盈虛日月同

餘艖從陸起州浦隔阡通跳沫噴巖翠翻波帶景紅
怒湍初抵北却浪復歸東寂聽堪增勇晴看自發蒙
伍生傳或謬枚叟說難窮來信應無已申威亦匪窮
衝騰如決勝迴合似相攻委質任平視誰能見始終

陂

漾陂西南臺

杜甫

高臺面蒼陂六月風日冷蒹葭離披去天水相與永
懷新目似擊接要心已領彷彿識鮫人空蒙辨魚艇
錯磨終南翠顛倒白閣影齒岑增光輝乘凌惜俄頃
勞生愧嚴鄭外物慕張邴世復輕驕驕吾甘雜鼃鼃

唐詩類友 卷之二十八
知歸俗可忽取適事莫並身退豈待官老來苦便辭
況資菱芡足庶結茅茨迴從此具扁舟彌年逐清景
與鄆縣群官泛漾陂 岑參

萬頃浸天色千尋窮地根舟移城入樹岸闊水浮村
閒鷺驚簫管潛蚪傍酒樽暝來呼小吏列火儼歸軒
與鄆縣源少府泛漾陂 岑參

載酒入天色水涼難醉人清搖縣郭動邊洗雲山新
吹笛驚白鷺垂竿跳紫鱗憐君公事後陂上日娛賓
任鄆令漾陂遊眺 韋應物

野水濫長塘煙花亂晴日氛氳綠樹多蒼翠千山出

遊魚時可見新荷尚未密屢往心獨閒恨無理人術

漾陂行

杜甫

岑參兄弟皆好奇攜我遠來遊漾陂天地黯慘忽異
色波濤萬頃堆琉璃琉璃漫汗泛舟入事殊興極憂
思集鼉作鯨吞不復知惡風白浪何嗟及主人錦帆
相爲開舟子喜甚無氛埃鳧鷺散亂棹謳發絲管啁
啾空翠來沈竿續蔓深莫測菱葉荷花靜如拭宛在
中流渤澥清下歸無極終南黑半陂已南純浸山影
動裊窅冲融閒船舷暝蔓雲際寺水面月出藍田關
此時驪龍亦吐珠馮夷擊鼓群龍趨湘妃漢女出歌

唐言類及
卷之三十一
舞金支翠旗光有無咫尺但愁雷雨至蒼茫不曉神
二
後時柰老何向來哀樂何其多

遊秋浦白筇陂二首

李白

白筇夜長嘯爽然溪谷寒魚龍動陂水處處生波瀾
天借一明月飛來碧雲端故鄉不可見腸斷正西看

二

何處夜行好月明白筇陂山光搖積雪猿影挂寒枝
但恐佳景晚不令歸棹移人來有清興及此正相思

汎前陂

王維

秋空自明迴況復遠人間暢以沙際鶴兼之雲外山

澄波淡將夕清月皓方閑此夜任孤棹夷猶殊未還

仲夏入園東陂

儲光羲

方塘深且廣伊昔俯吾廬環岸垂綠柳盈潭發紅蕖
上延北源秀近屬幽人居暑雨若混沌清明如空虛
此鄉多隱逸水陸見樵漁廢賞亦何貴爲歡良易攄
且言重觀國當此賦歸歟

東陂秋意寄元八

白居易

寥落野陂畔獨行思有餘秋荷病葉上白露大如珠
忽憶同賞地曲江東北隅秋池少遊客唯我與君俱
啼蛩隱紅蓼瘦馬蹋青蕪當時與今日俱是暮秋初

節物苦相似時景亦無餘唯有人分散經年不得書

扈亭西陂燕賞

韋應物

杲杲朝陽時悠悠清陂望嘉樹始氤氳春遊方浩蕩
沉逢文翰侶愛此孤舟漾綠野際遙波橫雲分疊嶂
公堂日為倦幽襟自茲曠有酒今滿盈願君盡弘量

南陂遠望

儲嗣宗

閑門橫古塘紅樹已驚霜獨立望秋草野人耕夕陽
孤煙起蝸舍飛鷺下漁梁唯有田家事依依似故鄉

黃子陂

司空曙

岸芳春色曉水影夕陽微寂寂深煙裏漁舟夜不歸

皇陂

羅隱

皇陂激濼深復深陂西下馬聊登臨垂楊風輕弄翠
帶鯉魚日暖跳黃金三月窮途無勝事十年流水見
歸心輸他谷口鄭夫子偷得閒名直至今

羨陂

鄭谷

昔事東流共不迴春深獨向羨陂來亂前別業依稀
在雨裏梨花寂寞開却展漁絲無野艇舊題詩句沒
蒼苔潛然四顧難消遣祇有佯狂泥酒杯

坡

步東坡

白居易

朝上東坡步夕上東坡步東坡何所愛愛此新成樹
種植當歲初滋榮及春暮信意取次栽無行亦無數
綠陰斜景轉芳氣微風度新葉鳥下來萎花蝶飛去
聞攜斑竹杖徐曳黃麻屨欲識往來頻青蕪成白露

憶遊朱坡四韻

杜牧

秋草樊川路斜陽覆盜門獵逢韓嫣騎樹識館陶園
帶雨經荷沼盤煙下竹村如今歸不得自戴望天盆

朱坡

杜牧

下杜鄉園古泉聲繞舍啼靜思常慘切薄宦與乖睽
北闕千門外南山午谷西倚川紅葉嶺連寺綠楊堤
迴野翹霜鶴澄潭舞錦鷄濤驚堆萬岫舸急轉千溪
眉點萱牙嫩風條柳幄迷岸藤稍虺尾沙渚印麕蹄
火燎湘桃塢波光碧繡畦日痕緝胡官切翠巘陂影墮
晴霓蝸壁爛斑蘚銀延荳蔻泥洞雲生片段苔徑繚
高低偃蹇松公老森嚴竹陣齊小蓮娃欲語幽笋稚
相攜漢館畱餘趾周臺接故蹊蟠蛟岡隱隱班雉草
棲棲樹老蘿紆組巖深石啓閨侵牕紫桂茂拂面翠
禽棲有計冠終挂無才筆謾提自塵何太甚休笑觸
藩羝

朱坡絕句三首

杜牧

唐詩類考 卷之三十一
故國池塘倚御渠江城三詔換魚書賈生辭賦恨流
落祇向長安住歲餘

煙深苔巷唱樵兒花落寒輕倦客歸藤岸竹洲相掩
映滿池春雨鷓鴣飛

乳肥春洞生鵝管沼避迴巖勢犬牙自笑卷懷頭角
縮歸盤煙磴恰如蝸

長樂坡

白居易

行人南北分征路流水東西接御溝終日坡前恨離
別謾名長樂是長愁

磯

登蒲洲石磯望橫江口潭島深迴斜對香零

山

柳宗元

隱憂倦永夜凌霧臨江津猿鳴稍已疎登石娛清淪
日出洲渚淨澄明晶無垠浮暉翻高禽沈景照文鱗
雙江匯西奔詭怪潛坤珍孤山乃北峙森爽棲靈神
洄潭或動容島嶼疑搖振陶埴茲擇土蒲魚相與隣
信美非所安羈心屢逡巡糾字結良可解紆鬱亦
已伸高歌返故室自網非所欣

塘

和盧侍御通塘曲

李白

君誇通塘好通塘勝耶溪通塘在何處宛在潯陽西
青蘿嫋嫋柳煙樹白鷗處處聚沙堤石門中斷平湖
出百丈金潭照雲日何處滄浪垂釣翁鼓棹魚歌趣
非一相逢不相識出沒繞通塘浦邊清水明素足別
有浣沙吳女郎行盡淥潭潭轉幽疑是武陵春碧流
秦人鷄犬桃花裏將比通塘渠見羞通塘不忍別十
去九遲迴偶逢佳境心已醉忽有一鳥從天來月出
青山送行子四邊苦竹秋聲起長吟白雪望星河雙
垂兩足揚素波梁鴻德耀會稽日寧知此中樂事多

林塘懷友

王勃

芳屏畫春草仙杼織朝霞何如山水路對面卽飛花

瞿塘兩岸

杜甫

三峽傳何處雙崖壯北門入天猶石色穿水忽雲根
猱獮鬚髯古蛟龍窟宅尊羲和冬馭近愁畏日車昏

瞿塘懷古

杜甫

西南萬壑注勅敵兩崖開地與山根裂江從月窟來
削成當白帝空曲隱陽臺疏鑿功雖美陶鈞力大哉

初入瞿塘

白居易

瞿塘天下險夜上信難哉岸似雙屏合天如匹帛開
逆風驚浪起拔柁闔船來欲識愁多少高於灩澦堆

初秋蓮塘歸

顧況

秋光淨無跡蓮消錦雲紅只有溪
山還識揚舲翁
如何白蘋花幽渚笑涼風

蓮塘霽望

劉兼

新秋菡萏發紅英向晚風飄滿郡馨
萬疊水紋羅乍展一雙鷓鴣繡初成
採蓮奴散吳歌闕拾翠人歸楚
雨晴遠岸牧童吹短笛蓼花深處信牛行

漁塘十六韻

在朱陽縣石巖下古老云洛水一派流出此山

韋莊

洛水分餘脉穿巖出石稜碧經嵐氣重清帶露華澄

瑩徹通三島巖崿積萬層巢由應共到劉阮想同登
壁峻苔如畫山昏霧似蒸撼松衣有雪題石硯生冰
路熟雲中客名畱域外僧饑猿尋落橡鬪鼠墮高藤
嶮樹臨溪亞殘莎帶岸崩持竿聊籍草待月好垂罾
對景思任父開圖想不興晚風輕浪疊暮雨濕煙凝
似泛靈槎出如迎羽客昇仙源終不測勝槩自相仍
欲別誠堪戀長歸又未能他時操史筆為爾著良稱

寒塘曲

張籍

寒塘沈沈柳葉疎水暗人語驚棲鳧舟中少年醉不起
起持燭照水射遊魚

蘭塘詞

温庭筠

塘水汪汪鳧唼喋憶上江南木蘭檝繡頸金鬚蕩倒
光團團皺綠鷄頭葉露凝荷卷珠淨圓紫菱刺短浮
根纏小姑歸晚紅粧淺鏡裏芙蓉照水鮮東溝縮縮
勞迴首欲寄一杯瓊液酒知道郎却有情長教月
照相思柳

橫塘行

韋應物

妾家住橫塘夫婿鄰家郎玉盤的歷雙白魚寶簾玲
瓏透象牀象牀可寢魚可食不知郎意何南北岸上
種蓮豈得生池中種槿豈得成丈夫一去花落樹妾

獨長夜心未平

遊南塘寄知者

温庭筠

白鳥梳翎立岸莎藻花菱葉泛微波煙光似帶侵垂
柳露點如珠落卷荷楚水曉涼催客早杜陵秋思傍
蟬多鐫公不信歸心切處處江樓一曲歌

塘上行

李咸用

橫塘日澹秋雲隔浪織輕颼羅幕幕紅綃撒水蕩舟
人畫橈摻摻柔荑白鯉魚虛擲無消息花老蓮疎愁
未摘却把金釵打綠荷懊惱露珠穿不得

塘上行

李賀

唐詩類苑 卷之三十六
藕花涼露濕花缺藕根澀飛下雌鴛鴦塘水聲溘溘

塘下行

孟郊

塘邊日欲斜年少早還家徒將白羽扇調妾木蘭花
不是城頭樹那棲來去鴉

堆

灩澦堆

杜甫

巨石水中央江寒出水長沈牛答雲雨如馬戒舟航
天意存傾覆神功接混茫干戈連解纜行止憶垂堂

灩澦堆

杜甫

灩澦既沒孤根深西來水多愁太陰江天漠漠鳥雙

去風雨時時龍一吟舟人魚子歌為首估客胡商淚

滿襟寄語舟航惡年少休翻鹽井橫黃金

望韓公堆

崔滌

韓公堆上望秦川渺渺關山西接連孤宦一身千里
外未知歸日是何年

拂雲堆

李益

漢將新從虜地來旌旗半上拂雲堆單于每近沙場
獵南望山陰哭始回

瀑布水

入廬山仰望瀑布水

張九齡

絕頂有懸泉喧喧出煙杪不知幾時歲但見無昏曉
閃閃青崖落鮮鮮白日皎灑流濕行雲濺沫驚飛鳥
雷吼何噴薄箭馳入窈窕昔聞山下蒙今乃林巒表
物情有詭激坤元曷茲矯默然置此去變化誰能了

望廬山瀑布水

李白

昔登香爐峯南見瀑布水挂流三百丈噴壑數十里
欸如飛電來隱若白虹起初驚河漢落半灑雲天裡
仰觀勢轉雄壯哉造化功海風吹不斷江月照還空
空中亂溲射左右洗青壁飛珠散輕霰流沫沸穹石
而我遊名山對之心益閒無論嗽瓊液且得洗塵顏

仍諧宿所好永願辭人間

湖口望廬山瀑布水

張九齡

萬丈紅泉落迢迢半紫氛奔飛流雜樹灑落出重雲
日照虹霓似天清風雨聞靈山多秀色空水共氤氳

廬山瀑布

裴說

靜景憑高望光分翠嶂開嶮飛千尺雪寒撲一聲雷
過去雲衝斷旁來繞障迴何當任峯下中歲絕塵埃

秋霽望廬山瀑布

夏侯楚

常思瀑布幽晴眺喜逢秋一帶連青嶂千尋倒碧流
濕雲應悞鶴翻浪定驚鷗星浦虹初下爐峯煙未收

巖高時裊裊天淨起悠悠儻見朝宗日還須濟巨舟
遊廬山瀑布水 李白

日照香爐生紫煙遙看瀑布挂長川飛流直下三千
尺疑是銀河落九天

瀑布

章孝標

秋河溢長空天灑萬丈布深雷隱雲壑孤電挂巖樹
滄溟曉噴寒碧落晴盪素非趨下流急勢使不得住

尋簡寂觀瀑布

韋應物

躡石欹危過急澗攀崖迢遞弄懸泉猶將虎竹爲身
累欲付歸人絕世緣

簡寂觀西澗瀑布下作

韋應物

淙

一作深

流絕壁散虛煙翠澗深叢際松風起飄來灑

塵襟窺蘿翫猿鳥解組傲雲林茶果邀真侶觴酌洽
同心曠歲懷茲賞行春始重尋聊將橫吹曲一寫山
水音

題仙巖瀑布呈陳明府

方干

方知激蹙與噴飛直恐古今同一時遠壑流來多石
脉寒空撲碎作凌澌謝公巖上衝雲去織女星邊落
地遲聚向山前更誰測深沈見底是澄漪

石門瀑布

方干

唐詩類考 卷之二十八
奔傾漱石亦噴苔此事便隨元化來長片挂巖輕似
練遠聲離洞咽於雷氣侵松樹千枝潤勢畫雲霞一
道開直是銀河分派落兼聞碎滴濺天台便隨一

東山瀑布

方干

遙夜看來宜月照平明失去被雲迷挂巖遠勢尋松
塢擊石殘聲注稻畦素色噴成三伏雪餘波流作萬
年溪不緣真宰能開決應向山前雜淤泥

噴玉布

孟郊

去塵咫尺步山笑康樂巖天開紫石屏泉縷明月簾
仙疑刻削跡靈綻雲霞織悅開若有待瞥見終無厭

俗玩詎能近道嬉方可淹踏著不死機欲歸多浮嫌
古醉今忽醒今求古仍潛古今相共失語默兩難恬
贈君噴玉布一濯高嶄嶄

